

Pablo Roma Anoaf Kirika Kenexô Fomani

Pablo Jesús Ifofaaf Roma anoaf kirika kenexô fomani

¹ Roma anoafãfe, ẽ mato kirika kenexô fomai. Ëkĩa Pablo, ẽ Jesucristo yonoxomis. Niospa ea nĩchini ẽ aõnoa yoimis inõ, ãfe meka shara Jesúsnoa yoinõ.

² Niospa ãfe Fake nokoõnoax naiyonõpokoai tãpixõ a Niospa meka yoimisfãfe meka kenenifo. Jesúsnoa meka shara yoinifo.

³ Niospa Fakeõnoa meka shara kenenifo a inõpokoai keskakã. Jesús Niospa Fakekõifiax David ãfe xini ini. Nã David nõko xinifãfe ãto xanĩfokõi ipaoni.

⁴ Niospa afama mĩshti fatiroxakĩ nõko Ifo Jesucristo otofani. Otofaxõ ato õimani nãmãi Niospa Fakekẽ. Niospa ãfe shinãmã ãfe Yõshi Sharaõxõ ãfe Fake otofani. Ato õimani Jesúsmaĩ ãfe Fakekẽ.

⁵ Jesucristoxõ noko noi. Noko noikĩ ãfe shinã noko inãni. Nãskaxõ noko nĩchini Jesúsnoa yoimis nõ inõ. A judeofomari a xoko fetsafori afãferi Jesús chanĩmara fanõfo nõ yoiaino. Jesús chanĩmara fakaxõ nikasharakõinõfo.

⁶ Mãri mã mã Jesucristo chanĩmara feito mato nĩchini mã afe yorafo inõ.

⁷ Roma anoafãfe, ẽ mato kirika kenexô fomai. Niospa mato noixõ mato ifini mato chaka soaxoxiki afe yorafo mã inõ. Mato noikĩ mãto shinã

mēraxō mato shināsharamanō. Epa Nios feta nōko Ifo Jesucristo mato askafanō.

Pablo a Jesús chanīmara faafo Roma anoafu ato ōipaini

⁸ Ē mato yoinō. Nikakapo. Keyokōichi a maitio anoafāfe mato yoimisfo, mā Jesús chanīmara faito ōikakī. Nāskakē, “Aichora,” ě Nios famis. Jesucristoxō, “Aichora,” ě famis.

⁹ Ēfi Nios yonoxokōikai. Chanīmakōi ě yonoxonikai. Ē feparanima. Āfe Fakeōnoa ě meka shara yoimis. Pena tiifi ě mato Nios kīfixōfafāini. Niospa tāpia.

¹⁰ Ē mato ōisharapai. Nāskaxō ě Nios kīfifafāini ě mato ano kapaikī. Akka ě kai, ě kayamai ě kaima. A Niospa ea nīchipaiyaino ě katiro.

¹¹ Ē mato ōisharapai. Ōikaxō ě mato Niospa meka yoipai. Niospa āfe Yōshi Sharaōxō ě mato yoipai mā chanīmara fakī finakōinō Jesús Ifo sharakōi faxiki.

¹² Nāskax Jesúsnoax nō inima faatanānō. Mā Jesús chanīmara faino ě inimatiro. Nāskarifiakī ě chanīmara faino mā inimatiro.

¹³ Efe yorafāfe, ě mato tāpimapai mā tāpinō afeskaxma ě matoki kapai ě katiroma mei, ě kamisma. Mē kāta katamis ifiakeranax afara fetsa aki ě kamisma, mato ari kapaifi. Mai fetsa aria ichanāmisfo judeofoma nāfo ě Jesús ato chanīmara fama. Nāskari fakī ě matori askari famapai.

¹⁴ Jesús ea yoia ě āfe meka keyokōi ato yoinō. Nā kirika kenekī tāpiafo ita a kirika kenekī tāpiamafori ě ato yoikai. Nafafoya a nafamafori ě ato yoitiro. Ē ato yoiaito nikakakī Jesús chanīmara fanōfo.

15 Nāskari fakī ē Jesúsnoa mato Roma anoari yoikapaimis.

16 Jesúsnoa meka shara yoipaikai ē ranotiroma. Āfe meka xafakīa shara. Noko Niosnoa tāpimatiro a tsōa atiroma keskara Niospa atiro. Nō chanīmara faito Jesucristoxō Niospa noko chaka soaxotiro nō afe ĩpaxanō, nō fenoyamaino. Taefakī judeofāfe nikakōinifo. Akka iskaratīari judeofomafāferi nikakani afe ipaxakakī.

17 Nā Jesúsnoa meka sharaōxō Niospa noko ōimatiro. Nō Jesús chanīmara faito Niospa nōko chaka noko soaxotiro. Nānori kenenifo iskafakakī: “A Jesús chanīmara fakōinaifo Niospa āto chaka ato soaxō afaa chakafamisma keskara ato ōi. Nāskax shara ipanakafo Nios fe.”

Keyokōi yorafo chakamisfo

18 Niospa meka nikakaspaiifāfe a chakafamisfo Niospa ato ōimani ato omiskōimakī. Niospa meka chanīmakōifiano nikakaspakata yora fetsafori ato Niospa meka chanīmara ato famakaspakani.

19 Nōko Nios afe keskaramākī tāpipaikī nō tāpitiro. Akka Niospa noko ōimamis.

20 Nō Nios ōiyamafixō nō tāpitiro Niospa keyokōi onifani, nāmāi Nioskōi ixō. Nā Niospa onifani ōikī nō tāpitiro tsoa fētsa keyokōi atiroma. Nios fistichi atiro, afama mīshti. Nāskakē Nios nikakaspaiifāfe Nios chanīmara fapaikanima, a onifani ōifikakī. Nāskakē Niospa ato omiskōimani nāfāfe Nios tāpipaikanima. Akka tāpipaikī tāpikeranafo.

21 A Niospa onifani ōifikakī iskafakī yoipaikanima: “Nios fistichi keyokōi onifani. Aicho, Nios finakōia,” ikaxō shināpaikanima. Nāskakaxō āto shinā

mēraxō afara shināsharakanima. Afara chaka fisti shinākani āto ōiti fakish keskara ikaxō.

²² “Nōfi tāpikōiaki,” ifiakaxō tsōa shināsharaima.

²³ Niosfi sharakōikī shara enenakama. Nāfi isharapakenakakī. Isharakōifiaito Ifofapaikanimā. Askata yorafo isharayamaino yora fet-safāfe afara yora keskara onifakaxō, “Na nōko Niosra,” ikaxō kīfimisfo Nioskōi kīfikaspakakī. Yoinā keskara onifakaxō, peya keskara onifakaxō, rono keskarari onifakaxō, nāskarafo onifakaxō, “Na nōko Niosra,” ikaxō kīfimisfo.

²⁴ Askafaifāfe ōikī Niospa anā ato Ifofamaima. Nā chakafapaiyaifo fisti akaifāfe ōikī Niospa ato xatemanima. Nāskax āa ranā fekaxte faatanākani.

²⁵ Nios fistifi chanīmismaki. Nā chanīyamafimiskē tsōa Ifofapaima nā fisti nōko Nios sharakōifiano. Niospa keyokōi onifafianino tsōakai Ifofapaima. Akka nā Niospa onifanifo, “Nā nōko niosra,” ikaxō kīfitaifamisfo. Tsōakai Nioskōi Ifofapaima, mēxotaima sharafinakōia ifiamiskē. Nāskakē, “Epa Niosi, mī sharafinakōia,” ikaxō yoikani. Askapakexapainōfora.

²⁶ Askafaifāfe ōikī Niospa ato chaka xatexonama, afara chakafapaiyaifo fisti akaifāfe. Niospa noko onifani feronāfake yafi kēro, kēro feronāfake fe inō. Askafafianino kēro rafe fichināpaikani chaka ikani.

²⁷ Askatari feronāfake rafe fichināpaikanax chotanākani, kēro tanatama. Askax chaka ikanax omiskōikani.

²⁸ Nāskakakī chaka fisti shināpaikani. Anā Nios shināpaikanimā. Askafaifāfe ōikī Niospa ato potai nā apaiyai keskara fakī chaka fisti shinānōfo.

29-31 Chaka fisti feyafakanax chaka shinākani. Chaka faatanāi xatekanima. Feronāfakefāfe āto āfima fichipaikī chotamisfo. Kērofāferi āto fenema fichipaikī chotamamisfo. Nāskaxō afara shara āa atonā fisti fipaikani. Fetsafo chakafakī xatekanima. Fetsafo xītipaimisfo. Yora retemitsamis ita, setemitsamis ita, feratenā faatanāmisfo. Ōitifishkikī feyafamisfo. Ato pārafōfāsafamisfo. Ato noikaspamifāfe fetsafonā fiapaikakī. Ato noikaspamisfo. Chanīmisfo fetsafo pāramisfo. Nios noikaspayanā tosa noimisfoma. Īchamitsamisfo. Kakapaimisfo, āa kakamepaimisfo. Afara fetsa chaka shināi iskakani: “Afaa chaka fetsa ē afeska faimēti,” ixō shinākani. Āto apa yafi āto afa nikakaspakani. Afara shara shinākanima. A yoiāi keskara amisfoma. Āa chanīmisfo. Tosa noikanima. Ōitifishkikax fetsaki raemisfoma.

³² “Askakanax nakanax omiskōipakenakafo,” ixō Niospa anori yoini. Niospa yoiāi keskara āto shinā mēraxō tāpifikaxō afara chaka xatemisfoma. Askata fetsafāfe afara chakafaifāfe ōikani atoki inimamisfo.

2

Niospa mēstekōi noko ōixō yoitiro: “Nāto afaa chakafamisma. Akka natori chakafamis,” noko fatiro

¹ Ēfe kaifo judeofāfe, ē mato yoinō. Mā fatorafāfe yoi iskakī: “Na keskara yorafāfe afara chakafaifo omiskōipakenakafo,” ixō mā shināmis. Anori shināfikī māri ato keskarari afara chakafamis. Nāskata, “Nō afaa chakafamisma,” mā itiroma.

2 Mā nō tāpia, Niospa ato tāpikōia a yorafāfe chaka shināifo. Nāskakē ato omiskōimaxii. Niospa tāpikōixō chanīmakōi yoi.

3 Mā, “Nato afara chakafara,” ixō māri mā aki. ¿Nāskakī mā shināimē: “Niospa noko omiskōimani,” ixō? Akka nāskakē ē mato yoi. Niospa matori omiskōimani mā afara chakafaito.

4 Niospa mato noi. Mā chakafafaito mato omiskōimarifaima. Mato noikikai mato omiskōimapaima. Nāskakē, “¿Nā ē ipaiyai keskara ē iki,” ixō mā shināimē? Askara shināyamakāfe. Niospa mato noikī mato shinā fetsafaxopai mato chaka mā xatexō āfe meka mā nikasharakōinō.

5 Niospa mato shinā fetsafaxopafaito mā nikayospakōi. Māto ōiti mā kerexfaxō mā Nios nikakaspai. Mā kai māto shinā mā fetsafapaima māto chaka mā xatexiki. Mā askafiaino iskaratīa Niospa mato omiskōimayōima. Akka mā mai keyoaino mato omiskōimaxii mā kairoko māto chaka xateano. Nā keyokōi yora chakafo ato omiskōimanaitīari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii.

6 Nā nō imis keskara Niospa tāpikōia. Nāskax nō naano keyokōi noko kopifaxii mā nōko mai keyoaino.

7 Yora fetsafāfe shara shināmisfo a Niospa ato amapaiyai keskara apaikī. Niospa ato inimatiro. Askatari Nios fe ipaikani. Askara yorafo Nios fe ipanakafa.

8 Akka yora fetsafāfe nā apaiyai keskara shinākani. Niospa meka nikakaspakani. Chaka

fisti shinākani. Askarafoki Nios atoki ōitifishkixō ato omiskōimani.

⁹ Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax.

¹⁰ Nā Nios chanīmara faafo tii Niospa ato imasharaxii a keskara inōfo. Nāskaxō ato yoixii iskafakī: “Māfi sharaki. Mā ea nikasharakōia. Nāskax mā efe isharapakenaka,” Niospa ato faxii. Nānori judeofo yoixii. A judeofomari ato yoixii askafakī.

¹¹ Niospa ōia nāskarafos ōi yorafo, a judeofo ōita a judeofomari nāskarafos ōi.

¹² Akka a Moisés kirika keneni tāpiamato afara chakafaax omiskōipakenaka. Nios fe ipanakama. Askatari a Moisés kirika keneni tāpiato afara chakafaax nāri omiskōipakenaka. Nānori Moisés kenekī yoini: “A afara chakafamisfo omiskōipakenakafo,” ixō Moisés kirika keneni.

¹³ A Moisés kirika keneni keskara nikafikakī nikakaspaifo. Afokai Niospa shara ato ōima. Akka nā Moisés kirika keneni keskara nikakōiaifo, “Sharafora,” Niospa ato faxii.

¹⁴ Moisés Niospa meka a judeofoma ato kirika kenexonima. Askafekē a Moisés keneni keskara judeofomafāfe tāpiamafikaxō āa tāpikōikaxō shara shinākani. Nāskakaxō a Moisés keneni tāpiafo keskara ikafo tāpiamafikanax.

¹⁵ Moisés keneni tāpiamafikaxō shināsharaifono fetsafāfe ato ōitirofo Moisés keneni keskara Niospa ato shinā mēra ato shināmana. Akka sharafakaxō shinākakī iskafatirofo: “Ē afaa chakafama,” ixō shinātirofo. Akka afara chakafaxō shinākani iskatirofo: “Oashta, ě afara chakafaa,” ixō

shinãtirofo. Nãskaxõ anã afaa chakafapaikanima.

¹⁶ Niospa nõko õiti mēraxõ nõ shinãito noko tãpikõia. Jesucristori noko tãpia. Akka yorafãfe nõko õiti mēraxõ nõ shinãito noko tãpiafoma. Nãskakē mā nõko mai keyoaino Niospa noko yoikī iskafaxii māmāi noko tãpixõ: “Nafu sharafo. Akka nafori chakafo,” noko faxii. Nãskara ẽ yorafo yoimis.

Moisés judeofo Niospa meka kenexoni

¹⁷ Ea nikakapo, efe yorafãfe. ¿Mā shinākī iskafatiromē? “Nõrifi nõ judeofoki. Moisés kenei keskara mā nõ tãpia. Nõfi Niospa afe yorafoki,” mā imis.

¹⁸ Moisés kenenioxõ Niospa mato amapaiyai keskara mā tãpitiro. Askatari mā asharakõikī mā tãpitiro.

¹⁹ Akka mā shinãmis iskafakī: “A Moisés kenei tãpiafoma yora fēxo keskarafu. Nãskakē nõ ato tãpimasharatiro ato õiti xafa shara inõfo, anã fakish keskara inõfoma,” ixõ mā shināi.

²⁰ “Nã afara shara tãpimafori nõ ato tãpimatiro,” mā iki. Nãskatari, “Nã rama tãpiaifori nõ ato yoitirora,” ixõ mā shināi. Mā shināi iskafakī: “Mā nõ Moisés kenei tãpikõia. Nãskaxõ nõ ato yoitiro noko chanĩmara fanõfo,” ixõ mā shināi.

²¹ A Moisés kenei keskara mā ato yoifikī, ¿afeskakĩri mări mā nikakõimamē? “Atoki yomet-soyamakãfe,” mā ato fafai mări mā yometsoi.

²² “Mãto ãfima fe iyamakãfe,” mā ato fafiãx mări mãto ãfima fe mã chotanãmis. Askatari yora fet-safãfe afara onifakaxõ, “Na nõko niosra,” famisfo. Askafafiaifono mã ato yoimis: “Anã ano Nios fet-sama. Nios fisti. Afara yora faxõ, ‘Na nõko niosra,’

fayamakāfe,” mā askafamis. Mā ato askafafiai āto nios kīfiti pexefā mēranoax mā yometsomis.

²³⁻²⁴ Māfi yoikī iskafamis: “A Moisés Niospa meka kirika keneni nō tāpikōia,” nā kakapaimisfo keskara mā imis. Askafafixōkai a Moisés keneni keskara mā akama. Mā askayamaito ōikakī judeofomafāfe yoikī iskafamisfo: “Niospa afe yorafo judeofo isharafo. Nāskakē Niosrikai sharama,” ixō yoimisfo. Askafakī matoōxō Nios chakafaifo. Nānori Niospa meka yōra kirika keneni.

²⁵ Moisés judeofo kirika kenexoni iskafakī: “Māto fake feronāfakefo foshki repa xatekāfe mato tāpinōfo mā judeofokē,” ixō Moisés kirika keneni. Māto fake foshki repa mā xatefixō nā Niospa mato yoini keskara mā nikayamaito Niospa mato ōi judeofoma keskara. Niospa yorafo mā itiroma mā judeofofix. Nāskarari nā Epa Niospa noko yoini keskara mā ikaito Niospa mato ōi judeokōifo keskara.

²⁶ Judeofoyamafixō Niospa meka nikaifono Niospa judeofo keskara ato ōi afe yorafo keskara.

²⁷ Nā judeofoma foshki repa xateyamafikaxō a Moisés Niospa meka yoikī kirika keneni tāpiyamafikaxō nā Niospa yoini keskara chanīmara fakanax nāskarafofi sharafoki mato keskarama. Akka māfi judeofofixō a Moisés kirika keneni tāpifixō mā nikakōima. Moisés mato Niospa meka yoikī kirika kenexofianino mā nikasharakōima.

²⁸ Māfi judeofo kāinikī. Nāskaxō mā foshki repa xatemis. Akka mā judeofofixō a Niospa yoini keskara mā nikaima. Nāskax mā judeokōifo keskarama. Mā māto feyafatifixō māto chaka mā xatemisma. Nāskaxkai mā Niospa afe yora ikima.

29 Moisés kirika kenekĩ yoini keskafakĩ judeofāfe āto fakefo foshki repa xatemisfo ato tāpinōfo judeokōifokē. Akka judeofo atirifāfe Nios shinākanima. Nāfofi judeomakōifo keskara. Nāfokai Niospa afe yorafoma. Akka judeofo atirifāfe Nios shinākani. Nāfofi judeokōifokĩ. Nāfofi Niospa afe yorafokĩ. Niospa Yōshi Sharapa noko ōiti fetsafaxōano Nios keskara shara ikafo. A Moisés kirika kenenito noko ōiti fetsafaxotiro. Niospa Yōshi Sharapa noko ōiti fetsafaxotiro. Akka yorafāfe, “Mīfi sharakĩ,” noko fayamafiaifono Niospa, “Mī sharakĩ,” noko fai.

3

1-2 ¿Nō judeofoxō nōko fakefo nō foshki repa xatemiskē sharamē? Ēje, shara itiro. Akka nōfi judeofo fake kāiniki. Moisés Niospa meka yoikĩ noko kirika kenexoni. Nāskakē nō inimai nō judeofo. Efe yora mīshtichi, shinākapo. Epa Niospa nā yorafo tii yoipaiyai keskara nōko kaifo taeyoi ato yoiyoni. Noko tāpimanai keskarari nō yora fetsafori nō ato tāpimanō āfe meka.

3 Akka nōko kaifāfe atirifāfe Niospa meka ifo shara fayamaifono akka Niospa a yoiyai keskara amis.

4 Yorafo chanĩmisfo. Akka Nios ramashara chanĩmismo. Yorafāfe keyokōichi noko pārafiaifono akka Niospa noko pāramismo. Nā David Niospa meka yoikĩ kirika keneni iskafakĩ:

Niospa āfe meka mēstesharakōi yorafāfe ōinōfo. A shara shināifo Niospa ato sharafaxōi. Akka a chaka shināifo Niospa ato tāpimakĩ omiskōimaxii, ixō David yoikĩ kirika keneni.

⁵ Nios fistifi sharakōiki. Nōkai a keskarama. Nāskakē nō chakafaito yorafāfe ōikakī shinātirofo iskafakakī: “Nios iskarama, Niosfi sharakōikī. Na yorafāfe afara chakafakani. Akka Niospa afaa chakafamisma,” ixō shinātirofo. Nāskaxō Nios sharara fakani. Akka nāskaxō āa yora fētsa shinātirofo iskakī: “Ē afara chakafaito ōikakī yorafāfe yoitirofo: ‘Akka Nios iskarama, Nios shara.’ Nāskakē ē chaka shināi yorafāfe Nios sharakōi ōinōfo ea keskarama. Nāskakē Niospa ea omiskōimatiroma ē chakafafaito,” ixō yora fētsa shara shināima. Nāskara shinākī yōra shināi keskara shināi, Niospa shināi keskara shināima.

⁶ Nios chakama. Nios mēstekōi ika. Akka mēstekōi iyamaxō yorafo yoikeranama iskafakī: “Nafo sharakōifoki. Ē ato sharafaxōi. Akka nafori chakafo. Ē ato omiskōimani,” ixō Niospa yoikeranama mēstekōi iyamaxō.

⁷ Yora fētsa āa shināi iskatiro: “Yorafāfe ea yoitirofo ē chanīaito ōikakī. Iskafakakī ea yoitirofo: ‘Mī Nios keskarama. Nios chanīmisma. Nios mēstekōi ika,’ ixō ea yoitirofo. Akka ē chanīaito ōikakī fetsafāfe, ‘Nios sharakōi, mia keskarama,’ ea faxikani. Nāskakē ē shinātirofo iskafakī, Niospa ea yoitirofo iskafakī: ‘Mī afara chakafafaito ē mia omiskōimaxima,’ ea Niospa fatiro,” ixō āa yōra anori shināi. Anori Niospa yoiyamafiano āa shināi askatiro.

⁸ Iskafakakī yoipaikani: “Nō afara chakafanōkāfe. Nō afara chakafaito ōikakī yorafāfe, ‘Nios sharara,’ fanōfo,” ixō yoipaikani. “Nā Pablori anori yoimiski nō afara chakafanō,” ixō yoikani. Āa chanīmisofo. Ēkai anori yoimisma. Epa Nios chanīmisma. Nā keskara yorafo ato

omiskõimaxii.

Nõ keyokõichi chakafamis

⁹ “Nõ judeofo sharakõifo. Akka nã judeofoma sharafoma,” ã faima. Askatamaroko ã iskafakĩ yoimis: “Nõfi nã judeofoma õitsa, nãskarafos nõ. Nõ keyokõichi afara chakafamis. Nãskakẽ Niospa ato yafi noko omiskõimaxii noko tãpimakĩ,” nãnori ã yoimis.

¹⁰ Niospa meka yoikakĩ kirika kenenifo iskafakakĩ:

Tsoa pishtakai nã Niospa yoia keskara famisma.

¹¹ Tsoa pishtakai Nios shinãpaikanima. Tsõakai Nios tãpipaisharakanima.

¹² Tsoa pishtakai anã Nios Ifofapaikanima. Afara chaka fisti fapaikani. Afara sharakai tãpiafoma. Tsõa pishtakai sharafamisma. Fato fistichikai shara Ifofaima.

¹³ Yora naax maiax fepekemeax pisi kãitiro. Nãskarifiakĩ nõko axfapa meka chaka fisti nõ yoimis. Mã nõ ato pãrakĩ feyafamis. Nã rono paekapato noko chachiano nõ paemetiro keskarari nõko meka chakaõnoax omiskõixikani.

¹⁴ Nõ ato fekaxtefapaikĩ meka mitsisipato fisti nõ mekamis. Nõ ato ãchari famis.

¹⁵ Tsoa afayamafekẽ nõ ato retepaimis.

¹⁶ Nõa kafãsakĩ nõ ato omiskõimafofãsafamis. Nõa nõ ato fekaxtefaafofãsafaki.

¹⁷ Yora fetsafokai nõ ato raefapaimisma ato fe isharaxikima.

¹⁸ Nõko shinã mẽranoaxkai Nioski nõ rateima. ãfe meka nõ nikapaima. Nõko chaka nõ xatepaima,

ixõ nãskara yoikĩ kirika kenenifo.

19 Mā nō tāpia a Niospa yoia keskara Moisés noko kirika kenexoni. Akka tsōakai Niospa meka nikakōimisfoma. Nāskaxō tsōa yoitiro ma iskakī: “Ēfi afaa chakafamismaki. Ē shara imis,” tsoa itiro ma. Akka Niospa noko yoitiro iskafakī: “Māri afara chakafamiski,” keyokōi noko fatiro.

20 Nāskakē Niospa meka a Moisés noko kenexoni nō nikapaifiaito, Niospa noko yoikī iskafatiroma: “Mā shara imiski,” noko fatiroma. Akka tsōa āfe meka nikasharakōima. Āfe mekaoxō nō tāpitiro keyokōichi nō chakafamisfo.

Jesucristo chanīmara faax nō Nios fe ipaxatiro

21-22 Iskaratīa Niospa noko afara fetsa tāpimana. Noko xafakīa ōimana afeska faxō noko imasharatiromākī a keskara shara nō inō. Moisés kenenioxō noko shara imaima. Akka nō Jesucristo chanīmara fakē Niospa noko shara imatiro Jesús māi noko nāxonikē nōko chaka noko soaxoxiki. Nānori Niospa meka Moisés yoikī kirika keneni. Niospa meka yoimisfāferi nānoriri kenenifo. Nā keyokōichi Jesucristo chanīmara faifo Niospa ato shara imai. Judeofo, judeofomafori Niospa shara imatiro Jesús chanīmara faifāfe.

23 Keyokōichi mā nō chakafamis. Tsoa Nios keskarama. Nios sharakōi. Afaakai chakafamisma. A keskarakai tsoama.

24 Nāskakē Niospa noko noikī nōko chaka noko soaxotiro nō Jesucristo chanīmara faino. Akka Jesucristo nōko chakaōnoax noko nāxonni. Nāskaxō nōko chaka noko soaxoni. Nō afaa kopifatiroma Niospa noko shara imanō.

25 Āfe Fake Jesucristo nīchini āfe imi foax nōōnoax nanō nōko chaka noko soaxoxiki. Nāskaxō Niospa noko omiskōimanimā. Nō Jesús chanīmara faino Niospa nōko chaka noko soaxoni nō shara inō. Nāskaxō nō ōitiro Nios sharakōi. Jesús nayoa-mano chakafafiaifono Niospa teneyoni. Ato omiskōimayonima Niospamāi tāpixō āfe Fākemāi chipo ato nāxoxiaino Niosmāi mēstekōi ixō.

26 Jesús nōko mai ano oax noko nāxoni. Nāskakē nō chanīmara faito Niospa nōko chaka noko soaxoni noko imasharai. Nāskaxō Niospa noko ōimasharai amāi mēstekōi ixō.

27 Nāskaxō tsōa yoitiroma iskafakī: “Ēfi sharaki, fetsafo keskarama. Nāskax ē Nios fe ipanaka,” ixō tsōakai yoitiroma. Moisés kirika kenekī yoini keskara nikafixō tsōa anori yoitiroma. Jesucristo noko nāxoni nōko chaka noko soaxoxiki nō shināsharanō. Nāskakē nō Jesús chanīmara faino, “Jesús nōko chaka noko soaxoni nō afe ĩpaxanō,” ixō nō yoitiro.

28 Nāskakē anā nō mato yoi. Jesucristo nō chanīmara fakēma a Moisés kirika keneni keskara nō ifofafiaito nōko chaka noko soaxonima. Akka nō Moisés meka nikaito Niospa, “Mī afara sharafamiski,” noko fatiroma. Akka nō Jesús chanīmara faito, “Mī Jesúsnoax isharakōimis,” noko fatiro.

29 Nāskakēri, ¿Niospa judeofo fisti ato ifitiromē afe yora inōfo? Maa, judeofomāfori ato ifitiro Jesús chanīmara faifono afe yora inōfo.

30 Niosfi fistiki. Judeofori, judeofomāfāferi Jesús chanīmara fakanax Nios fe nīpanakafo ato chaka soaxonano.

³¹ ¿Nõ Jesús chanĩmara faxõ a Moisés kirika keneni nõ potatiromẽ? Maa, nõ potatiroma. Jesús chanĩmara faxõ a Moisés Niospa meka yoikĩ kirika keneni nikakĩ nõ chanĩmara fatiro.

4

Abraham Nios chanĩmara fakõini keskara yorafãferi keyokõichi Nios chanĩmara fatirofo

¹ Akka nõko xini Abraham ipaoni keskara ã mato yoinõ.

² Abraham afara sharafaõxokai Niospa ãfe chaka soaxonima. Akka Nios chanĩmara faito Niospa ãfe chaka soaxoni. “Mĩ afara sharafaito nãskakẽ ã mia ifitiro mĩ efe yora inõ,” ixõ Niospa anori yoinima. Akka Niospa anori yoiano Abraham yoikerani: “Ë afara sharafaito ea Niospa chaka soaxona,” ixõ yoikerani ãa kakapaikĩ. Akka anori Niospa yoinima, nã Niospamãĩ mã ãfe chaka soaxonano chanĩmara faito.

³ Niospa meka yoikĩ Moisés kirika keneni iskafakĩ: “Abraham Nios chanĩmara faito Niospa ãfe chaka soaxoni. Nãskakẽ Niospa yoini iskafakĩ: ‘Mĩ afaa chakafamisma keskara ã mia õi,’ Niospa fani.” Nãskakẽ Moisés kirika keneni.

⁴ Akka feronãfãke yora fetsa yonomaxõ kori inãtiro, kaxpa inãtiro.

⁵ Akka nõ afara sharafaõxokai Niospa nõko chaka noko soaxonima, nõ afaa chakafamisma keskara noko õixiki. Askatamaroko nõ Jesús chanĩmara faito Niospa nõko chaka noko soaxotiro.

⁶ Nãskarari David yoini iskafakĩ: “Mã Nios chanĩmara faito oa afaa chakafamisma keskara Niospa mato õitiro a Moisés keneni keskara mã

nikakōiyamafiaito. Nāskax mā inimatiro.” David anā yoini iskafakī:

⁷⁻⁸ Fatora yora Niospa āfe chaka soaxonano inimatiro Niospamāi ōiaino afaa chakafamisma keskara. Mā Niospa yora āfe chaka soaxō Niospa anā shināchakaima a yōra afara chakafapaoniōnoa. Nāskax yora inimakōitiro Niospamāi mā āfe chaka soaxonano, ixō David yoini kirika kenekī.

⁹ ¿Nā judeofo fisti Niospa āto chaka ato soaxotiomē? Maa, anorima. Judeomafāferi Nios chanīmara faifāfe ato chaka soaxotiro afori inimanōfo. Nāskakē Niospa meka yoimisto kirika keneni iskafakī: “Abraham Nios chanīmara faito Niospa sharakōi ōini,” ixō a Niospa meka yoimisto kirika keneni.

¹⁰ Akka taeyoi Abraham foshki repa xateyomanano Niospa yoini iskafakī: “Mī ea chanīmara fai nā mī afaa chakafamisma keskara ē mia ōi,” Niospa fani.

¹¹ Nios chanīmara faito Niospa Abraham āfe chaka soaxoni afaa chakafamisma keskara ōixiki. Nāskaxō chipo Abraham foshki repa xatenifo fetsafāfe tāpinōfo Nios chanīmara faino. Akka taeyoi Abraham Nios chanīmara fani askayoxoma. Nāskaxō chipo foshki repa xateni. Taefakī Abraham Nios chanīmara fani Niospa fake ixiki. Nāskano a chipo Nios chanīmara faifo Abraham āfe fenafo. “Abraham nōko xini ipaoni,” fatirofo. Abraham keskara nō foshki repa xateyamafixō nō Nios chanīmara faito Niospa noko chaka soaxotiro afaa chakafamisma keskara noko ōixiki.

¹² Abraham askayoxoma Nios chanīmara fani.

Nāskaxō foshki repa xateni. Nā Abraham jude-ofāfe āto xini ipaoni. Judeofo a Nios chanīmara faafāfe nāfāfe āto xinikōi Abraham nafāferimāi Nios chanīmara fakanax.

Niospa noko yoiai keskara noko axōi

¹³ Niospa Abraham yoini: “Ē mia yafi mī fenafo keyokōi ē mato mai ināikai,” fani. A Moisés kirika keneni Abraham nikaito Niospa mai inānima. Akka Nios chanīmara faito Niospa mai ināni. Nāskaxō Abraham Nios chanīmara faito Niospa āfe chaka soaxoni, afaa chakafamisma keskara shara ōikī.

¹⁴ Fetsafāfe anorima shinātirofo iskafakakī: “Nō Moisés kirika keneni nikaito Niospa a yoiai keskara noko axotiro. Akka Jesús fisti nō chanīmara faito Niospa noko axotiroma. Kaxpa nō Jesús shināi,” ixō anorima shinātirofo. Akka nōroko Jesús chanīmara faito Niospa yoia keskara noko axosharatiro Jesúsmāi nōko Ifoxō.

¹⁵ Akka Niospa meka a Moisés yoini keskara nō nikayamaito Niospa noko omiskōimatiro. Akka Niospa noko afaa yoiyamanino nō nikayospa ikeranama. Akka iskaratīa nō nikayospakōifo mā nōmāi Moisés kirika keneni tāpiax.

¹⁶ Taeyoi Niospa Abraham yoiyoni Nios chanīmara faino. Nāskakē Niospa afama mīshti axoni a yoiyoni keskafakī. Niospa Abraham afaa yōkanima afama mīshti axosharaxō. Akka Abraham āfe fenafori Niospa ato noikī nāskaxō afama mīshtiri ato axosharai a yoiyoni keskafakī. A Moisés yoini keskara nikakōiaito Niospa afama mīshti axosharanima. Akka Nios chanīmara faito Niospa axosharani. Nāskarari a Abraham

keskarafo Nios chanĩmara faifori Niospa ato shara faxõ. Akka Abraham nõko xinikĩ nõmãi Nios chanĩmara fai Abraham ipaoni keskara.

17 Niospa Abraham yoini keskafakĩ, yora fẽtsa kirika kenekĩ iskafani: “Nã yora ichapakõifo ãto apa keskarakõi mĩ inõ,” ixõ kirika keneni. Abraham Nios chanĩmara fani. Askaxõ Abraham nõko epa keskara Niospa õi. Niospa nã namisfori anã otofatiro. Nãskaxõ Niospa afama mĩshti onifatiro tsõa õimismafo. Nãskakẽ Abraham Nios chanĩmara fani.

18 Nãskax Abraham anifokõi ini anã fake atiro-maxakĩ. Nios chanĩmara faito Niospa yoini: “Mĩ chipo fake fixii. Mĩ fenaforti ichapa rasi kaixikani,” ixõ Epa Niospa yoini keskara Abraham chanĩmara fani. Nãskax, “Yorafãfe ãto xini mĩ iki,” Niospa fani.

19 Nãskax Abraham anifokõi ini. Cien xiniya aka. Sara ãfe ãfiri yõxafokõi ini. Anã yõxafoxõ fake fitiroma inji. Nãskafixõ Abraham Nios chanĩmara fani. “Ë anifokõi, ã anã fake fitiroma,” ixõ Abraham shinãnima. “Akka Niospa tsõa atiroma keskara fatiro,” ixõ Abraham shinãkĩ Nios chanĩmara fani.

20 “Mĩ ãfi Sara fake nanexii,” ixõ Niospa yoini. Niospa nãskara yoiaito nikakĩ Abraham Nios chanĩmara fani. Niospa askafafiaino, “Ëfe ãfi yõxafokõia. Anã fake nanetiroma,” ixõ Abraham shinãnima. “Niospa ea yoia keskara ea axotiro. Aicho, Nios fãsi sharakõi,” fani.

21 Niospa axõai keskara fakĩ Nios chanĩmara faxõ Abraham afaa fetsakai shinãnima.

22 Nãskakẽ Niospa yoini: “Mĩ ea chanĩmara fai afaa chakafamisma keskara ã mia õi,” Niospa fani.

23 Niospa Abraham askafaniõnoa yõra kirika

keneni iskafakī: “Nios chanīmara faifāfe afaa chakafamisfoma keskara Niospa ato ōi,” ixō Abrahamnoa fisti kirika kenenima. A Nios chanīmara faifo Niospa ato ōi afaa chakafamisfoma keskara māmāi āto chaka soafono.

²⁴ Nokori askara kenexoni nō Nios chanīmara faito. “Nōko Ifo Jesús naafiakē Niospa otofani,” nōri chanīmara fakē, afaa chakafamisma keskara Niospa noko ōi.

²⁵ Nōko chakaōnoax Jesús nani nōko chaka noko soaxoxiki. Askata mā otofaano aōnoax afaa chakafamisma keskarafo nō ixii.

5

Nō Nios chanīmara faito afaa chakafamisma keskara Niospa noko ōi

¹ Nōko Ifo Jesucristo nō chanīmara fakē nōko chaka noko soaxonano aōnoax nō Nios fe ishara-pakexatiro.

² Nō Jesús chanīmara faito noko noikī Niosya noko rafemani. Nāskakē, “Ē Nios ikano kaax ē a keskara shara itiro,” ixō nō shināi nō akiki inimakōitiro.

³ Askatari Jesúsnoax omiskōi nōko shinā mēra nō inimakōitiro. Askax nō a keskara nō itiro. Omiskōifaito Jesús āfe shināmā nōko shinā mēra noko mitsisfamaxotiro nō tenenō.

⁴ Akka Jesúsnoax omiskōikī nō tenei nō yora finakōia ipainākafatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe ipaxanō.

⁵ Nō askara shināi nō rāfitiroma Niospamāi a yoia keskara noko axōaino. Akka noko Niospa noikōikī āfe Yōshi Shara nōko shinā mēra noko nanexotiro.

⁶ Akka nõa nõko chaka nõ soametiroma. Nãskakẽ Niospa afe Fake nõchipaiyaitĩa nai mẽraxõ nãmã nõchini yora chakafoõnoax naaxinõ.

⁷ Tsõakai yora fetsa nãxopaitiroma sharaflano. Ëtsa, itiro rakikĩa yora nai yora sharafoõnoax.

⁸ Akka nõ chakafokẽ Niospa afe Fake nõchini noko nãxonõ. Nãskakẽ nõ tãpitiro Niospa noko noikõiai.

⁹ Askax nõõnoax naano afe imi foni. Nõ chanĩmara fakẽ afaa chakafamisma keskara noko õi noko chaka soaxõ. Akka nõ chakakẽ Jesús nõõnoax nani. Nãskakẽ iskaratĩa mã nõ chanĩmara fakĩ finakõia. Anã nokoki Nios õitifishkikĩ noko omiskõimaxima.

¹⁰ Askata nõ Nios noikaspaino afe Fãke noko nãxoni Nios fe nõ rafenõ. Nãskax nõ iskaratĩa Jesús afe yorafo nõ afe rafekõia. Askaxõ noko sharafakĩ finakõi. Jesús nakẽ Niospa anã otofani, nõri afe nipaxanõ.

¹¹ Akka nõ Nios noikaspayoni. Iskaratĩa mã nõko Ifo Jesucristoõxõ noko raefaa nõ afe isharakõia. Nãskakẽ Jesús Nioski noko inimamasharakõia.

Adãõxõ yorafãfe keyokõichi chakafamisfo. Akka Cristo nõko chaka noko soaxotiro

¹² Niospa nã feronãfake Adán taefakĩ onifani. Nã Adán taefakĩ afara chakafani. Nãskakẽ aõxõ afara chakafapafo. Nã Adán afara chakafaniõnoax keyokõi nõ natiro nõmãi keyokõichi afara chakafaax.

¹³⁻¹⁴ Mã Adán afetĩama naniano Moisés Niospa meka yoini kirika kenenĩ afe keskara nõ niimãkai. Akka Niospa Moisés yoiyoamano keyokõichi chakafayopaonifo. Nãskax mã nai keyonifo. Fetsafãfe chakafafiakaxõ Moisés

kirika keneni tāpīpaonifoma. Askafafiaifāfe oa afaa chakafamisfoma keskara Niospa ato ōini tsōakairoko āfe meka tāpikē. Adán keskara foma. Adán Niospa meka tāpīfiāx nikayospani. Nāskaxō Adán chakafakī taefani. Nāskarifiakī yorafāfe keyokōichi chakafamisfo. Akka nāskax mā nai keyokani, Adánmāi taeyoi nanikē. Nāskarifiāi Cristo oni yora chakafoōnoax naiyoi. Nāskakē yorafo aōnoax nīpaxatirofo.

¹⁵ Akka Jesucristo Adán keskarama. Adán Nios nikakaspax nani. Nāskakē nōri aōnoax natiro. Akka Jesúsxō Niospa yorafo noikōikī ato imashara-pakenaka afaa chakafamisma keskaramāi ato ōikī. Akka nā Adán nai taeni afara chakafaax. Nāskax yorafo Adánnoax nāpanakafo. Akka Jesús Ifofakanax Jesús fistiōnoax keyokōi isharapakenakafo. Jesúsxō Niospa ato raefatiro a chanīmara faafo tii.

¹⁶ Adán afara chakafaniōnoax yorafo nai keyotirofo. Nāskatari āto chakaōnoaxri nai keyotirofo. Akka nō keyokōichi chakafakē Niospa noko omiskōimatiro. Nā Adán ani keskarakai Cristo afaa chakafamisma. Mā nō keyokōichi afara chakafamiskē Jesucristoōxō Niospa noko noikī nōko chaka noko soaxotiro afaa chakafamisma keskara noko ōikī. Omiskōitamaroko nō afe isharapakexanō.

¹⁷ Adán āfe chakafoōnoax keyokōi nakani. Akka Cristo fisti nokoōnoax nani nō aōnoax Nios fe nīpaxanō Niospamāi noko shara ōiaito. Jesucristoōxō Niospa noko noixō noko nimapakenaka. Nāskakē noko askafaxōkī Jesús Adán finōkōia.

¹⁸ Nāskakē ē mato yoiai keskara nā feronāfake

Adán ãfe chakaõxõ keyokõi Niospa noko omiskõimani. Akka Jesúskaí afaa chakafamisma. Nãskakẽ nã chanĩmara faafo tii Nios fe nĩpanakafo. Nãskakẽ nã afaa chakafamisma keskara Niospa ato imai.

¹⁹ Akka nã feronãfake Adán Nios nikakaspakĩ taefani. Nãskax Adán nikayospakõi taeyoi ini. Keyokõichi aõxõ nõ chakafapamis. Akka nã Cristo fistichi ares Nios nikakõimis. Afaakai chakafamisma. Nãskakẽ nã chanĩmara faafo tii aõnoax afaa chakafamisma keskarrafo ipanakafo.

²⁰ Moisés Niospa meka yoikĩ ato kirika kenexoni afara chakaõnoa tãpinõfo. Akka nã Moisés ato kenexoni mã õifikakĩ a Niospa ato yoia keskara tsõa nikakõikanima. Keyokõichi afara chakafamisfo. Mã chakafakĩ finafafono Niospa ato noisharakõixõ ãfe Fake atoki nĩchini ato chaka soaxonõ.

²¹ Afara chaka fisti shinãkani namisfo. Akka Niospa noko noikõia. Nãskakẽ ãfe Fake Jesús noko nãxoni nõko chaka noko soaxoxiki. Nãskakẽ nõ Jesús chanĩmara faito Niospa afaa chakafamisma keskara noko õi. Noko chaka soaxonano nõ afe ipanaka.

6

Cristo nia keskara nõri afe nĩpatiro

¹ Akka yorafãfe atirito shinãkakĩ iskakani: “Nõ afara mēxotaima chakafafiaino Epa Niospa noko noikĩ nõko chaka noko soaxotiro. ¿Nãskakẽ nõ afara chakafa fafafaĩtiro,” ixõ anori shinãkani sharamẽ? Maa, sharama.

² Nāskakē afara chaka shināyamakāfe. Nō Jesús chanīmara faxō mā nōko chaka nō pota. A nō ipaoni keskara nō anā shināpaima.

³⁻⁴ Mā mā tāpia noko maotisafani nō fetsafo ōimanō. Nāskax nō a Jesús fe naa keskara nō chaka ipaoni keskara anā shināima. Nāskakē nōko chaka soapaikī nō Jesús chanīmara faino noko maotisafani. Jesús nokoōnoax naano maifanifo. Nāskax nō afe naa keskarax nōri maia keskara. Akka Jesús naax otoiñakafata Apa ari kani. Nōri nono mai anoax Jesúsnoax ari nō katiro. Askaxō Apa Niospa mā Jesús otifaxō noko ōimani nāatomāi afama mīshti fatiroxakī. Nōko ōiti noko fetsafaano a nō ipaoni keskara nō anā itiroma, a keskara sharakōi nō ipai.

⁵ Cristo nōkoōnoax nani. Nā nō chanīmara faax nō afe rafetiro. Nāskakē Jesucristo nakē Apa Niospa otofani keskafakīri anā otofatiro, a keskara shara nō inō.

⁶ Jesús mastanifo nōko chaka noko soaxonō. Nōri Jesús fe masta keskarakōi anā chakafapaima. Nāskarifiāi nō Jesús Ifofaax nō afe naa keskara. Nāskaxō nō anā chaka shināima. Afara chakafo nōko ifoma.

⁷ Akka yōra nāxokai anā chaka shinātiroma. Nāskarifiāi nōri chaka shinātiroma afara chakakairoko nōko ifokē.

⁸ Nō Cristo fe naa keskaraxō nō Jesús chanīmara faax nō afe isharapakenaka nāmāi nō chanīmara faax.

⁹ Mā nō tāpia Cristo mā nafiano Niospa otofani. Nāskax anā natiroma. Anāikai afeskax Cristo natiroma.

¹⁰ Akka nai fistinixakī nōko chaka noko soaxoni anā afara chaka nōko ifo inōma. Nāskakē iskaratīa

Cristo mã nia. Nãskaxõ nã Niospa apaiyai keskafai.

¹¹ Mãri Cristo fe naa keskara. Nãskakẽ iskaratĩa mã shinãtiro iskakĩ: “Ë chaka ipaoni keskara anã shinãpaima. Nãskax ã iskaratĩa Jesucristoõnoax Epa Nios fe rafe kakaini ea amapaiyai keskara axiki,” ixõ anori shinãkãfe.

¹² Nãskaxõ afara chaka anã ifofayamakãfe afara chaka mato famapai kiki a keskara mã anõma.

¹³ Nãskax Niosnoax isharakãfe. Afara chaka mato famapaifaito nikayamakãfe. Afara chakafamis iyamakãfe. Nios Ifofakãfe mato sharafanõ. Iskafakãfe: “Nios ãfe Ifokõixõ ea amapaia keskara ã aki sharafakĩ.”

¹⁴ Akka anã afara chakapa mato afeska fatiroma. Afara chaka anã mãto Ifo itiro ma mã mã Cristo chanĩmara faano. Epa Niospa mato noikĩ ares fisti mato ifitiro mã afe ipaxanõ. Akka nã Moisés kirika kenenioõnoaxkai mã Nios fe ipaxatiroma.

Epa Niospa mato amapaiyai keskara mã nikakõiyã mã yonoxokõitiro

¹⁵ Moisés yoini keskara nõ nikaito Epa Niospa noko nimasharaima. Akka Cristo nõ chanĩmara faito noko noikĩ noko nimasharatiro. Nã fisti nõko Ifo itiro noko chaka soaxonano. Nãskatari, nõ afara chakafa fafãitiromẽ Niospa noko noikĩ nõko chaka soaxonõ? Maa, nõ afaa chakafatiroma.

¹⁶ Mã tãpia ãfe yonomatixõ mãto ifo nikakõiyã mã yonoxotiro. Nãskarifiakĩ mã katotiro fatomãkĩ mãto Ifo. Epa Nios mã nikakõitiro ãfe yonomati ixii, askayamai chaka mã katoax mã ãfe yonomati mã itiro. Chaka katoax mã naax mã omiskõixii,

mã Nios fe nipanakama. Askatamaroko Epa Nios nikakõiax mã afe isharapakenaka.

¹⁷ Mã afara chaka ifofaax ãfe yonomati mã ipaoni. Akka iskaratĩa mã mã Epa Nios Ifofaa. Mato yoimis keskara mãto shinã mëraxõ mã nikakõimis. ¡Aicho! Mã mã Epa Nios Ifofaano mato nimasharamis.

¹⁸ Nãskakêkai afara chaka anã mãto ifo itiroma anã mato yonomatiroma. Akka iskaratĩa afara shara fisti mãto ifo itiro. Mãfi ãfe inakõifoki.

¹⁹ Ë mato meka fekax yoima, mãto ifoõnoa ã mato yoinõ mã tãpisharakõinõ. Chaka fetsa fetsatapafo mãto ifo ipaoni. Nãskaxõ mã afara chakafakĩ finakõipaoni. Akka iskaratĩa Epa Niospa ãfe inafõ, mã. Anã afara chakafayamakãfe afara shara fisti mãto ifo inõ.

²⁰ Taeyoi afara chaka mãto ifo ipaoni. Nãskakê afara shara mã shinãpaonima mãto ifo ipanã.

²¹ ¿Mã ipaoni keskara sharamẽ? ¿Mato imasharapaonimẽ? Maa, a nõ ipaoni keskarakai anã afokai nõ shinãpaima. Afo nõ shinãi nõ rãfitiro. Nã chakafo xateyamax nã nõ naitĩa nã omiskõipakenakafo mẽra nõ katiro.

²² Nãskakê iskaratĩa afara chaka anã mãto ifoma. Epa Nios mãto Ifo. Mãfi ãfe yonomatifoki. Mã ãfe yonomatifokẽ mato sharafa fafafaĩni a keskara shara mã inõ mã afe ãpaxanõ.

²³ Nã afara chaka nõko ifono, ¿afanã noko kopi-faimẽ? Akka aõnoax nõ naax nõ omiskõipakenaka. Akka Jesucristo nõ Ifofaino Epa Niospa noko afaa kopi yõkaima nõ afe nipaxanõ.

Nō anā chaka ifofaxoma nō Cristo Ifofatiro

¹ Efe yorafāfe, mā mā tāpia nōko xanīfokōichi noko yoia keskara nō nikatiro. Nō niyoxō nō nikatiro. Akka mā nō naxō nō anā nikatiroma.

² Nāskarifiāi kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka.

³ Akka fene niyoanokai kēromā fene eneta fetsa fe fianātiroma. Askarafi chakakī. Chota feroma itiro. Akka fene naano kēro feronāfake fetsa fe fianā askara shara, ixō Moisés kenenī.

⁴ Akka mā fenē naxō anā āfe āfi yonomatiroma. Nāskarifiakī mā Cristo fe naa keskarax a Moisés kirika kenenī anā mā nikatiroma. Akka mā Cristo fe naa keskarax mā yora fena sharakōi itiro Cristo mātō Ifono. Mā Cristo naax otoiñākafanax Nios fe ipanaka. Nāskaxō afara shara mato amatiro mā Nios yonoxonō.

⁵ Nō Cristo Ifofamatai afara chaka fetsa fetsata-pafo nō ayopaoni. Moisés kenenī keskara atama nō chaka fisti shināpaipaoni. Nā chakaōnoax nō naxii.

⁶ Cristo noko nāxoni nōko chaka noko soaxoxiki nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarax nō yora fena shara iki. Afara chaka anā nōko ifoma. Askatamaroko āfe Yōshi Sharaōxō Niospa noko amapaiyai keskara noko amatiro. A fisti nō Ifofai, a Moisés kenenī keskara ifofay-opaonixaki anā nō ifofatiroma.

Moisés kenenioxō nō tāpia nō chakafamis

⁷ Iskafakī shināyamakāfe. A Moisés noko kenexoni, chakara fayamakāfe. Akka Moisés Niospa yoini keskara keneyamanikēkai nō chakafamis

nō tãpikeranama. Moisés keneni iskafakĩ: “Yora fetsanã afara fãpaiyamakãfe. Nō yora fetsanã fãpaikĩ nō chakafai,” Moisés anori keneyamanikẽ nō tãpikeranama.

⁸ Moisés anori keneni tãpifixõ nõko õiti chakakõikẽ nõ shinãsharaima. Nõkonãyamafekẽ nõ fichipaimis. Afara chakafori nõ fichipai. Akka Moisés Niospa meka keneyamanikẽkai nõ nikayospa ikeranama.

⁹ Niospa meka tãpixoma afara chakafafiakĩ nõ shinãma. Askata chipo nõ ãfe meka tãpifixõ nõ akama a noko yoia keskara. Nãskafaxõ ãfe mekaõxõ a nõ afara chakafamis nõ tãpitiro.

¹⁰ Niospa yoia keskara akax nõ nipaxatiro. Niospa yoiai keskara nõ akima mã tãpifiãx, askax nõ omiskõi. “Moisés keneni keskara ayamax nõ natiro,” ixõ nõ shinãmis.

¹¹ “Epa Niospa noko yoia keskara nõ aki. Nãskai nõ Nios fe nipanaka,” ixõ nõ shinãfikĩ nõ afara chakafakĩ nõ xateama. Akka chakapa noko pãrai. Nãskakẽ nõ tãpia nõko chakaõnoax nõ omiskõi nõ Nios fe nãpanakama.

¹² Moisés keneni keskara sharakõi nãmãi Niospa meka. Niospa meka mẽstekõi, chanĩmakõi.

¹³ A Moisés keneni sharafianokai a keneni keskara nõ nikasharamisma. Moisés kenenioxõ nõ tãpitiro nõ chakafamis. Moisés keneni õifikĩ, ¿afeskafaxõ nõko chaka nõ potatiromẽ? Nãskax nõ naax nõ omiskõipakenaka. ¿Moisés kenenioõnoax nõ omiskõipakenakamẽ? Maa, askarama. Akka nõ Nios nikakaspax nõ omiskõipakenaka. A Moisés keneni sharakõi, Niospa meka. Moisés kenenioõxõ nõ tãpia nõ nikayospakõi. Nõ Niospa meka

nikakōimisma. Nāskax nō chakakōi.

Nōakōi nōko chaka xatepaifikī nōko shinā mēraxō nō xatetiroma. Nōko shinā mēra chakakōi

¹⁴ A Moisés Niospa Yōshi Sharapa shināmanaino noko kenexoni. Niospa meka nō shināyamai nō sharama. Afara chakafi nōko ifokī nō āfe yonomati.

¹⁵ ¿Afeskai nō iskamismē? Nōkai tāpiama. Nō sharafapaiyai keskara nō akima. Akka nō akaspafiakī nō aki.

¹⁶ Moisés keneni keskara nō nikapai, “Nā meka shara,” shinākī. Askara shināfiki nō akima. Nā afara chakafapaiyamafikī nō aki.

¹⁷ Nōakai nō afara chakafapaima. Akka nōko shināmā nō shinākī nō afara chakafamis. Afara sharafapaiifikī nō shināsharaima, nōko shinā mēramāi chakakōikē.

¹⁸ Mā nō tāpia nōko shinā mēra sharama. Isharapaifi nō itiroma.

¹⁹ Akka a nō akai keskara sharama. Nā sharafapaiifikī nō amisma. Nā afara chakafapaiyamafikī nāskara nō amis.

²⁰ Nāskakī a nō akaspai nō aki. Nōakōi nō afara chakafapaima. Nō chaka potapaiifikī nō potatiroma nōko shinā mēramāi chakakōikē.

²¹ Akka nō askamiski. Nō sharafapaiifaito nōko shinā mēraxō afara chakapa noko fakirira shināmapai nō shara shinānōma. Nō keyokōi askamis.

²²⁻²³ Nōa nō iskafai: “Aicho. Niospa noko yoiai keskara shara,” ixō nō shināfi nō nikayospamis afara chakapamāi noko fekaxtefaito. Niospa meka nō tāpifiax nō nikayospamis. Nōa nō

sharafapaiyai keskara nō atiroma. Nō chaka xate-tiroma.

²⁴ Nāskakēkai ē inimaima. Ē shināchakai. Ēfi feronāfake chakakī. Ē inimaima. Ēfe shinā mēraxō ē afara chakafaax ē omiskōixii. Ooa. ¿Tsōa nō Ifofatiromē nōko Ifokōi inō, afara chaka anā nōko ifo inōma?

²⁵ Aicho Epa Nios. Ēfe Ifokōi Jesucristoōxō ēfe chaka ē xatetiropi. Iskaratīa ē tāpia Niospa meka nō ifofapaifikī afeska faxō nōa nō atiroma nōko shinā mēramāi chakakē. Akka Jesucristoōxō nō atiro.

8

Niospa Yōshi Sharaōnoax nō ika

¹ Akka Jesucristo nōko Ifono nō afe yora. Nāskakē Epa Niospa noko yoima iskafakī: “Mā chaka. Ē mato omiskōimanō. Emakinoax fotakāfe omiskōipakenakafo mēra nānoax mā omiskōipakenaka,” ixō noko yoipakenakama māmāi nōko chaka noko soaxō,

² Jesucristoōxō Niospa āfe Yōshi Sharapa noko nimasharai anā chaka nōko ifo inōma, nō omiskōipakexanōma.

³ Moisés yoini keskara nō tāpifiano aato noko imasharatiroma nōko chaka noko soaxotiroma. Akka Epa Niospa shināyoni āfe Fake nai mēraxō mai ano nīchixiki ari noko keskara yora inō. Noko keskarafixokai nō amis keskara afaa chakafamisma. Akka noko nāxoni anā afara chaka nōko ifo inōma.

⁴ Nāskata iskaratīa nō Niospa Yōshi Shara Ifofaax aōxō Moisés yoini keskara nō nikatiro. Nō Niospa meka ifofasharakōitiro.

⁵ Akka nõ chaka xateyamano afara chakapa noko amapaiyai keskara fisti nõ atiro. Akka Niospa Yōshi Shara noko ĩkināno nā noko amapaiyai keskara fisti nõ atiro.

⁶ Nā apaiyaifo keskara fisti shinākanax afo nakanax anā otokanax omiskōipakenakafo. Nios fe ipanakafoma. Akka Niospa Yōshi Shara ato mēra naneano nā apaiyai keskara Niospa Yōshi Sharaōxō atirofo. Nāskax isharapakenakafo shināsharakata.

⁷ Fetsafāfe Nios noikaspakani Niospa ato yoia keskara nikapaikani. Āto shinā mēraxō afara chaka fisti shinākani. Nāskaxō Niospa ato yoia keskara nikatirofoma.

⁸ Nā āto shināmā shināifo keskara fisti shinākakī Niospa ato amapaiyai keskara atirofoma. Afara chaka ifoiafono Nios atoki inima.

⁹ Akka mākai askarama. Māto shinā mēraxō afara chakapa mato shināmanima. Akka Niospa Yōshi Shara māto shinā mēra nanexō mato shināmasharamis. Akka Niospa Yōshi Shara māto shinā mēra naneyamaino mā Cristo fe rafetiroma.

¹⁰ Cristo mato fe rafefiaino afara chakaōnoax māto yora nai. Māto yora nafiano māto fēro mēsho naima Nios fe nipanaka Niospamāi afaa chakafamisma keskara mato ōiaino.

¹¹ Mā Jesús naano Niospa otofani. Nāato āfe Yōshi Shara māto shinā mēra nanea. Nāskarifiakī māto yora naano āfe Yōshi Sharaōxō Niospa anā mato otofatiro māto yora fenasharakōi inō.

¹² Efe yora mīshtichi, Niospa Yōshi Shara nofe rafeaino Epa Niosnoa nõ shinātiro noko amapaiyai keskara akī. A nõ afara chakafamiskai anā

nō shināpaitiroma noko Niospa amapaiyai keskara akī.

¹³ Akka a nō apaiyaifo keskara fisti shināx nō omiskōipakenaka nai. Akka nāskafixō Niospa Yōshi Sharaōxō afara chakafakī nō xatexō anā chaka nō shinātiroma. Nō Epa Nios fe nisharapakenaka.

¹⁴ Niospa Yōshi Sharapa noko shināmanaino nō Niospa fakefo iki.

¹⁵ Āfe Yōshi Sharapa noko shināmasharapai nō anā mesenōma. Mā nōfi Niospa Yōshi Shara fīaki. Nā āfe Yōshi Sharaōxō āfe fakefo noko ima. Aōxō nō yoitiro iskafakī: “Epa Nios, mī ēfe Epa,” ixō nō yoitiro.

¹⁶ Nōko shinā mēraxō Niospa Yōshi Sharapa noko yoi iskafakī: “Mī Epa Niospa Fakekōi,” ixō noko yoi.

¹⁷ Nō Niospa fakekē nā noko yoia keskara noko inātiro. Nōfi nō Niospa fakekē nā āfe Fake Cristo ani keskara nokori inātiro. Nōōnoax omiskōifinixakī iskaratīa nai mēranoax Apa Nios fe xanīfokōi. Nāskarifiai nōri aōnoax omiskōiax nō nai mēra Epa Nios ano nokoano noko sharafinakōia imaxii nō afe isharapakexanō, a keskara shara nō inō. Akka afe yorafo Niospa ato sharafaxōi nāfomāi āfe fakefokē.

Niospa fakefo Jesús fe isharapakenakafo

¹⁸ Nō iskaratīa omiskōiyofiax nō chipo Jesús fe isharapakenaka. A keskara sharafinakōi noko imai. Tsōa ōimisma keskara sharafo noko ōimaxii. A nō omiskōipaoni anā nō shināima.

¹⁹ Epa Niospa āfe fakefo otofaxii a keskara sharakōi ato imaxii. Akka nā Niospa onifan-

ifāfe manakani ōisharapaikōikakī afe keskarafō ato imaimākai.

²⁰⁻²¹ Niospa āfe fakefō sharakōi ato ōimaxii. Nāskatari a onifanifori sharakōi ixii. Anā afaa chaka ixiima. Afarafo anā payokomepakenakama. Akka iskaratīa nā Niospa onifanifo payokomepakenakafo askayamapaifiaifono. Nāskaxō Niospa yoini: “Adán afara chakafaōnoax keyokōi payokomepakenaka.” Akka Niospa āfe fakekōifo akiki nokoafono ato yora fetsafaxoxii anā payokomenōfoma, afara chakafāfe ato fekaxtefanōma. Nāskarīfiai Niospa onifanifori nā Niospa fakekōifo keskara shara ixii, anā payokomepakenakama.

²² Kēromā fake kākī pae meytiro. Mā kāixō anā pae metiroma. Nāskarīfiai a Niospa onifanifo omiskōiyokani. Akka mā Niospa ato fetsafaano anā omiskōixikanima.

²³ Akka nō Niospa fakefō āfe Yōshi Shara nofe rafeaino nō tāpitiro nō Nios ikano kaax nō isharakōixii. Akka iskaratīa nō isinī iki fekaxtei. Nāskakē nō manasharai Epa Nios ika ano noko ifinō nō āfe fakefokē a keskara shara noko imanō. Nāskatari nōko yora fena sharakōi noko imai anā nō isinī inakama. Anākai nō nanakama.

²⁴⁻²⁵ Nāskara nō shināi nō akiki nokoaito noko fetsafaxii a keskara shara nō inō. Nāskax nō afe ipanaka. Chanīmara faxō inimayanā nō manasharatiro fena fenakima nā nō akiki nokoaitīa. Akiki nokoxō nō anā manatiroma māmāi nō ōikī.

²⁶ Nāskarīfiakī Epa Niospa āfe Yōshi Sharapa noko axosharafafāini. Afeskaxō nō Epa Nios kīfisharatiromē nōkai tāpiama. Akka āfe Yōshi Shara nō mēra nanexō noko shināmanaino nō

kĩfisharatiro. Noko noikĩ noko kĩfixoni. Noko kĩfixonai keskarakai tsōarikai kĩfitiroma.

²⁷ Āfe Yōshi Sharapa shināi keskara Epa Niospa tāpikōia. Keyokōi nōko shinā mērari nō shināi keskara tāpikōia. Epa Niospa noko amapaiyai keskara nānori āfe Yōshi Sharapa a chanīmara faafo tii ato kĩfixomis.

Jesúsxō nō keyokōi finōkōitiro

²⁸ Akka nō tāpia Epa Niospa noko katoni a apaiyai keskara nō anō. Nō Epa Nios noiaino afarafāfe noko afeskarafaiaino afoxō Epa Niospa noko axosharai.

²⁹ Nō Jesús Ifofayoamano Epa Niospa tāpiyoni fatofomākĩ a chanīmara faifo. Akka chanīmara fayoaomano shināni iskafakĩ: “Nafo ěfe Fake keskara ě ato imaxii,” ixō shināyoni. Niospa āfe Fake iyoa Jesús. Nāskaxri nōri āfe fake chipoko ixii.

³⁰ Tāpiyoni nō āfe fakefo ixinō. Askano nōko shinā mēraxō noko yoini: “Ěfe Fake chanīmara fakāfe,” noko fani. Fatora anori yoixō ato chaka soaxoni isharanōfo, afaa chakafamisma keskara ato ōixii, ato chaka soaxonano āfe Fake sharakōi keskara inōfo.

³¹ Noko askasharafaino ¿nō fakiri yoitromē? Epa Niospa noko sharafakōinaino afara chakafāfe noko chakafamatiroma.

³² Epa Niospa noko noikĩ āfe Fake Jesús timamanima noko naxonō. Nāskanixakĩ noko axosharatiro nā apaiyai keskara nō anō.

³³ Epa Niospa noko katoni nō afe yora inō. Nāskaxō nōko chaka noko soaxonano afara chakafamisma keskara noko ōixiki. Askano fetsafāfe mĩ chakara noko faifono nō ato ifofaima.

³⁴ Jesucristo noko nãxokẽ Ãpa otofani. Iskaratĩa Apa Nios ika ano ika Apa feta ato keyokõi ìkinã. Epa Nios noko kifixõfafãini. Nã chanĩmakõikẽ tsõa, “Mĩ afara chakafamiski. Nãskax mĩ omiskõipakenaka,” noko tsõa fatiroma.

³⁵ Tsõakai Jesucristo nomakinoa potatiroma noko noiyamanõ. Nõ omiskõikãi, nõko shinã mẽra fekaxtekãi, nõ Jesúsnoa yoiaito noko omiskõimafãi, noko fonãimafãi, nõ rapati yopafãi, noko mesemafãi noko retepaifãi, keyokõi afãfekãi Cristo nomakinoa potatirofoma noko noiyamanõ.

³⁶ Niospa meka yoikĩ David kirika keneni iskafakĩ:

Epa Nios, pena tii mĩõxõ noko retepaikani. Nõ oveja keskara. Ifãfe nã oveja itipinĩfasharai retekiki. Nãskarifiakĩ a mĩõxõ noko chakafaifãfe noko retepaifirofo,

ixõ kirika keneni.

³⁷ Noko askafafiaifono keyokõi nã chakafo nõ finõkõitiro Jesús noko noiaino.

³⁸⁻³⁹ Jesucristo nõko Ifonokai afanã Epa Nios nomakinoa potatiroma anã noko noinõma. Nã ã chanĩmara fakõini. Epa Niospa noko noiaino afanã noko afeska fatiroma anã noko noinõma. Nõ nafiakẽkai nomakinoa afanã Nios potatiroma. Nõ niyoanori nomakinoa tsõa paxkatiroma. ãfe ãjirifãferikai nomakinoa paxkatirofoma. Yõshi chakafãferikai nomakinoa paxkatirofoma. Afarafo iskaratĩa ikaifãferikai nomakinoa paxkatirofoma. Inõpokoaiifãferikai nomakinoa paxkatirofoma. Afara chakafãfe ãto xãnifofofãferikai nomakinoa paxkatirofoma. Nã nai ari ikafãfe, mai ano ikafãferikai nomakinoa

paxkatirofoma. Epa Niospa nõko Ifo Jesucristoxõ noko noi. Nãskakẽ keyokõi onifanifãferikai nomakinoa paxkatirofoma anã noko noinõma.

9

Niospa judeofo katonî afe yora inõfo

¹ Ë Cristo fe rafexõ ã mato mẽstekõi yoi. Ë mato pãraima. Niospa Yõshi Shara ã mẽra naneano ãfe shinãmã shinãkĩ chanĩma ã mato yoi.

² Ë mato yoi iskafakĩ, ãfe kaifo atirito Cristo Ifofaafoma. Nãskakẽ ãfe shinã mẽra ã atoõnoax omiskõi kakaini. Ë ato shinãkõikĩ finamis afomã ãfe yorafokẽ.

³ Nãskakẽ ã shinãmis iskafakĩ: “Epa Niospa, ãfe kaifo nã israelifo ã ato axopai fenoyamanõfo, mefe nipaxanõfo omiskõipakenakafo mẽra fonõfoma. Nãskaxõ Cristo makĩnoa ea potãfe ato potakima ã ato omiskõixonõ afo omiskõipakexanõfoma. Nã ã fichipai ãfe kaifo judeofo Cristo fe ãpaxanõfo,” ixõ ã shinãmis.

⁴ Nõ judeofo, Jacobo ãfe fenafo. Epa Niospa noko ifini ãfe fakefo nõ inõ. Nãa Nios shara-finakõixõ nõko kaifo israelifo ato õimapaoni. “Ë mato afara sharafaxõikai. Cristo nã oxiai judeokõi ixii. Aõxõ ã mato sharafaxõikai,” ixõ Niospa yoini. Nãskara Moisés Niospa meka yoikĩ israelifo ato kirika kenexoni nikanõfo. Nãskaxõ ato tãpimani afeskaxõ Nios kĩfitirofomãki ichanãxõ. Nãskata afara sharakõi ato axoxiai keskara ato yoyoni.

⁵ Judeofãfe xinifãfe Epa Nios Ifofasharapaonifo. Cristori judeo fake kãini, Niospa Fakekõifiax. Nãskax arifi nõko xinifãfe ãto fena. Nãfi yorafãfe

ãto Ifokĩ, nãatomãi keyokõĩ ato ìkikẽ. Nãskakẽ, “Nios fãsi finasharakõia,” nõ fapaxanõ. Askapainõ.

⁶ Epa Niospa noko yoisharayoni keskara jude-
ofu atirito chanĩmara fayamafiaifono ãfe meka
chanĩmakõĩ. Afe yorafo yoiyoni keskara axii.
“Nã judefo Israelifãfe ãto fenafo ẽ katoa efe
yora inõfo,” ixõ Niospa yoini. Askafafiano atirito
Nios chanĩmara famisfoma. Nãskakẽ afe yorakõĩ
keskara Niospa ato õima.

⁷ Nãskarifiakakĩ Abraham apaoni keska fakĩ ãfe
fena atirifãfe Nios chanĩmara famisfoma. Afokai
Niospa yorakõifoma. Akka Niospa Abraham yoini
iskafakĩ: “Mĩ fakekõichi Isaaca ãfe fakefo mĩ fe-
nakõifo ixii, mĩ fake fetsafãfe ãto fakefori mĩ fe-
nakõifo ixiiima,” ixõ yoini.

⁸ Nãskano nõ tãpitiro Abraham ãfe fenafo atiri ãfe
fakekõifo Niospa ato õima. Akka Niospa Abraham
yoiyoni ãfe ãfinĩ Sara fake fixiai. “Nã fakefi mĩ
fakekõĩ ixii. Mĩ fakẽ ãfe fakefori mĩ fenakõifo ixii,”
fani. Nã yoini keskara Abraham Nios chanĩmara
fani. Nã Abraham Nios chanĩmara fai keskafakĩri
Nios chanĩmara faifono nãfofi Niospa fakekõifoki.

⁹ Abraham ãfe ãfinĩ Sara fake naneamatai Epa
Niospa yoiyoni iskafakĩ: “Xinia fẽtsa ẽ anã mikiki
nokoxii. Nãskano mĩ ãfi Sara fake kãixii feronãfake,”
ixõ Niospa Abraham yoini.

¹⁰ Nãskata Sara ãfe fake kãini. Nãskaxõ aneni,
Isaaca fakĩ. Nãskakẽ nã Isaaca nõko xini. Isaaca
naetapaxõ Rebeca fini ãfe ãfi inõ. Rebeca fake rafe
naneni. Nã fake rafeta ãto apakõĩ Isaaca ipaoni.

¹¹⁻¹² Rebeca fake kãini fake rafe naneax. Esau
kãĩ taeni. Chipu Jacobo ini. Akka kãiyofomano
tsõa tãpiyonima fatoto shara shinãimãkai, fatotori
chaka shinãimãkai. Nãskano Niospa fisti katoni

afe yora inō. Kāiyoafomano Niospa āto afa yoiyoni iskafakī: “Mī fake chipokoto āfe ochi yonomaxii,” fani. Akka Niospa nā apaiyai keskara fatiro, yorafāfe apaiyai keskara Niospa faima. Askano nō tāpitiro Niospa a inōpokoai keskara shināyoni nāskarākōi aki.

¹³ Nāskara Niospa meka yōra kirikaki keneni iskafakī: “Ē Jacobo ifipai efe yora inō. Esau ē fichipaima,” fani.

¹⁴ Nāskakē ĵiskara nō yoitiromē, “Niospa mā fake fisti katoa kāiyoafomano, afaa chakafayoafomano fisti mā kaōa akka fetsa katoama ōixoma. Nāskakē Niospa shināsharaima,” ixō nō shinātiromē? Maa, anori nō shinātiroma. Akka Niospa tāpisharakōia. Nā apaiyai keskara fatiro. Nā fichipaiyai katotiro.

¹⁵ Niospa Moisés yoini iskafakī: “Nā ē axopaiyai ē axosharaikai. Nāskarifiakī nā ē noipaiyai ē noisharaikai,” ixō Niospa yoini.

¹⁶ Askatari nō Nios nikasharatama nōakōi nō afe yora isharapaiyaito askara noko axōima. Askatamaroko Niospa noko noikī noko ifitiro afe yora nō inō, nāatomāi noko ōiti tāpikaxō. Nāskaxō noko noikī nā apaiyai keskara shara axōi.

¹⁷ Moisés kirika keneni iskafakī: “Epa Niospa Egipto anoa āto xanīfo yoini iskafakī: ‘Ē mia xanīfo imapaikī ē mia xanīfo imani mīoxō nā maitio ikafāfe tāpinōfo ē afama mīshti faito. Akka mī afara chakafaito ē mia potai mī anā xanīfo inōma. Ē mia askafaito ōikakī eōnoa ato yoitirofo nā maitio ikafāfe: “Nios tsoa keskarama āfe shināōxō mā Faraón pota,” ixō eōnoa yoitirofo,’ ixō Niospa Faraón yoini.”

¹⁸ Akka shinākapo. Nā Niospa ato noipaiyai

ato noikī axosharatiro. Nāskarifiakī fētsa afara chakafakī xateamano Niospa āfe ōiti nikayospakōi imatiro afaa shināpaiyamai keskara imatiro.

19 Nāskakē fētsa shinātiro iskafakī: “¿Afeskakī Niospa noko yoitiromē afara chakafamisfora fakī? Akka nāato noko amai nā apaiyai keskarafakī. Nāskakē noko omiskōimatiroma nō nikayospaio,” ixō fētsa yoitiro.

20 Askafayamafe. ¿Afeskakī mī Epa Nios kemapaimē? Mīfi yoraki. Aafi Nioski nā apaiyai keskara atiro. Akka a Niospa onifatokai yoikī iskafatiroma: “¿Afeskafakī mī ea iskara onifaamē?” ixō yoitiroma.

21 Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iskafatiroma: “¿Afeskakī mī ea iskara faamē?” ixō yoitiroma.

22 Nāskarifiakī Epa Niospa keyokōi yorafo onifafixō atiri ato potatiro āfe meka nikakaspafāfe. Fenāmāshta ato yoiyofiaito nikayospamisfo. Nāskakē anā teneima, mā atoki ōitifishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe.

23 Akka nōfi ato keskarama. Noko Niospa noikī noko tāpimamis. Nāskatari noko itipinīsharafamai inimakōikai nō nai mēra shara afe ĩpaxanō. Noko askafamakī yorafo ōimani nā noiaifo Niospa ato noikōia.

24 Noko judeofo fisti Niospa katonima nō afe ĩpaxanō. Akka judeofomafori ato katoni.

²⁵ Nānori Oseas Niospa meka yoikī kirikaki keneni iskafakī:

Fetsafo judeofomari ě katoxii efe yorafori inōfo. “Ĕ mato noi,” ě ato yoiyamafikatsaxakī, ě ato yoixii iskafakī: “Ĕ mato noikōi,” ixō Epa Niospa yoini keskara Oseas kirikaki keneni.

²⁶ Askata anā keneni iskafakī:

Niospa judeofoma ato iskafani: “Mā kai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakī: “Nafo Niospa fakefo. Epa Nios finakōia afama mīshti fatiro,” ixō yoixikani.

²⁷ Isaías israelifoōnoa yoini iskafakī: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarifiai judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakī.

²⁸ Nāskaxō nā yoiyoni keskara nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo,” ixō Isaías yoini.

²⁹ Isaías yoiyoni keskara nāskakōi. Nāskata anā yoini iskafakī:

Nōko Ifo finasharakōia nōko fenafo fetsafo ifini afe ĩpaxanōfo. Askafayamafiano anā judeofo ikeranama. Akka nō nai keyokerana Sodomā anoa fe Gomorra anoafo ini keskai, ixō Isaías kirika keneni.

Nā judeofoma na meka shara Jesúsnoa Pablo ato yoini

³⁰ Nāskakē ē mato yoi. Nā judeofomafāfe shināyonifoma iskafakakī: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki.

³¹ Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakī: “A Moisés kene ni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiro ma ato shara ōixiki.

³² ¿Afeskakī Niospa ato shara ōimamē? Ē mato yoinō. Afāfekairoko Jesucristo chanīmara faifono ato chaka soaxopanā. Askatamaroko Moisés ato yoini keskaraōnoax isharapaikī āto chaka soapaikani Niospa ato shara ōinō. Akka Moisés yoinioxō Niospa ato chaka soaxotiro ma. Ē mato afara fetsa anā yoinō. Tokiri fai nēxpakīa rakano finōpai akiki nō otisikaināi nō paketiro. Nāskarifiakī Jesús finōpaiyaifāfe chanīmara fakanima afe nīpāxakakīma. Akka nā yorafo oa nō tokiriki otisikai paketiro keskarafo. Nāskakī Jesús finōpaikakī shināchakatirofo. Akka tsōa Jesús finōtiro ma.

³³ Nānori Isaías Niospa meka yoikī kirika kene yoni iskafakī:

Nikakapo, judeofāfe āto pe xe rasi ano Niospa tokiri keskara nīchixii yorafo akiki otisikī shināchakaxinōfo. Nā tokiri efapaki yorafo otisikani paketirofo. Akka nāskarari nā Jesucristo chanīmara faafo tiikai paketirofoma. Anā shināchakakanima, ixō Jesúsnoa Isaías kirika kene ni. Akka Jesús nā

tokiri efapa keskarakōi.

10

¹ Efe yora mīsttichi, ěfe kaifo ě shinākī finakōi. Ě ato Nios kīfixōfafāini Jesús chanīmara fanōfo, Nios fe ĩpaxanōfo.

² Mē tāpia nāfāfe Epa Nios tāpisharapaikani. Nāskafikakī a Niospa ato tāpimapaiyai keskara shinākanima. Āa āto shināmā fisti shināxō akani.

³ Jesúsxō Epa Niospa āto chaka ato soaxotiro afaa chakafamisfoma keskara ato ōixiki. Akka nā Jesús ato chaka soaxotiro nikakaspakani. Āakōi shinākanax shara ipaikani.

⁴ Iskakakī shinākani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākani. Akka Moisés kenenioxō nōko chaka nōa nō soametiroma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakī nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ipaxakī. Nāskakī nō Cristo fisti Ifofatiro. Nō anā Moisés keneni nikatiroma.

Jesús yorafoōnoax ato nāxoni

⁵ Moisés kirika kenekī iskafani: “Epa Niospa noko yoini keskara ě kirika keneni. Fatora fětsa nā meka ifo sharakōi fai isharakōixii, afaa chakafaa-max. Akka māfi Nios fe ikōisharapakenakaki. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.”

6-8 Askata anã kirika kenekĩ iskafani: “Niospa noko yoini afeskax nõ shara itiomãkĩ. Nõ Cristo chanĩmara feito nõko chaka noko soaxotiro afaa chakafamisma keskara noko õixiki. Nã Cristo meka shara nõko shinã mēra ikakĩ. Nõ aõnoa tãpixõ nõ ato yoimis. Akka iskara shinãyamakãfe: ‘¿Tsoa nai mēra katiromē Cristo fotomaxiki nõ chanĩmara fanõ?’ Akka tsoakai nai mēra katiroma Cristo fotomaxiki. Askatari iskafakĩ shinãyamakãfe: ‘¿Afeskakõ mã Cristo naafianikē mai mēranoa nõ ifitiromē?’ ixõ shinãyamakãfe. Akka iskaratĩa Niospa meka nõ mēra ikakĩ,” ixõ kirikaki Moisés keneni. Nãnori nõ mato yoimis.

9 Akka, “Jesús ēfe Ifoki,” nõ ato fakĩ nõ shinãtiro iskafakĩ: “Chanĩma, Jesús nafianikē Apa Niospa otofani,” ixõ nõ shinãito nõko chaka noko soaxotiro nõ afe ãpaxanõ.

10 Akka nõko shinã mēraxõ nõ chanĩmara fakē Epa Niospa nõko chaka noko soaxotiro afaa chakafamisma keskara noko õixiki. Askatari, “Jesucristo ēfe Ifoki,” ixõ nõ ato yoiax nõ afe ipanaka.

11 Nãnori Niospa meka yoikĩ yõra kirika keneni iskafakĩ: “A Jesucristo Ifofakanax anã ãto ifo fetsa fenakanima. Cristo fistichi ato nimasharatiro afe ãpaxanõfo,” ixõ kirikaki keneni.

12 Judeofo feta judeofomafãferi Cristo chanĩmara faifono ãto Ifo itiro. Niospa ato õia nã yora fisti keskarafõ, nãskarafõs ato õi. Nãskaxõ fatatora yõkaito Niospa axosharakõifafãini aõ noikõikĩ.

13 Nãnorikõi Joel yoikĩ kirika keneni iskafakĩ: “Fatatora nõko Ifo chanĩmara faxõ yoikĩ iskafaito: ‘Mĩ ēfe Ifoki, ea ifife ēfe chaka ea soaxoxiki,’ feito ãfe chaka soaxotiro afe ãpaxanõ,” ixõ Joel kirika

keneni.

¹⁴ Akka tsōa Jesús Ifofaxoma, “Ea ifife ěfe chaka ea soaxoxiki,” ixō tsōa yōkatiroma chanīmara faxoma. Akka Jesúsnoa nikakatsaxakīma afeska faxō chanīmara fatirofoma. Tsōakairoko Jesúsnoa ato yoimiskē nikapanāfāfe.

¹⁵ Akka Niospa ato nīchiyamaino tsoa katiroma Niospa meka shara ato yoixikakī. Ākai fotirofoma. Nānori Isaías kirika keneni iskafakī: “A meka shara yoi feai sharakōi,” ixō yoini.

¹⁶ Ĕ mato yoinō Niospa mā yorafo nīchini Cristoōnoa meka shara ato yoitanōfo. Niospa meka yoisharafiaifono judeofo atirifāfe ato nikapaikanima. Nānori Isaías kirika keneni iskafakī: “Ĕfe Ifāfe, nō ato yoiaito tsōa chanīmara fama,” ixō yoini.

¹⁷ Nāskano Cristoōnoa meka shara yoiaito nikakakī fetsafāfe chanīmara fatirofo.

¹⁸ “Akka, ¿judeofāfe nā meka shara Jesúsnoa nikamisfomamē?” ixō fētsa ea yōkaito, ě kematiro iskafakī: “Ĕje, mā nikamisfo.” Nānori David yoini kirika kenekī iskafakī:

Nā maifo tii anoafāferi nā meka shara mā keyokōichi nikamisfo,
ixō David kirika keneni.

¹⁹ Mā shināiraka iskafakī: “Akka judeofāfe na meka shara Jesúsnoa mā nikafikakī nikasharamisfomara,” ixō mā shināi rakikīa. Akka ě mato yoi iskafakī, mā nikamisfo nā meka shara Jesúsnoa. Mēxotaima mā nikafikakī chanīmara faafoma. Akka israelifomafāfe Nios nikakatsaxakakīma mā rama aōnoa nikafo. Moisés Niospa meka yoikī kirika keneni iskafakī:

Nã judeofoma efe yora iyopaonifoma. Akka iskaratĩa ã ato noikõikĩ ã ato ifi efe yora inõfo. Ë ato askafaito õikakĩ judeofãfe ato noikas-paxikani ato xĩtipaikakĩ. Askatari, “Na judeofomafãfe afaa tãpiafoma, judeofãfe ato fafiaifono ã ato ifi efe yora inõfo. Nãskakanax judeofo atoki õitifishkixikani,” ixõ Niospa yoini,

ixõ Moisés kirika keneni.

²⁰ Chipo Isaíasri Niospa meka yoikĩ kirikaki keneni iskafakĩ:

A judeofomafãfe akõi ea fenayamafikatsax-akakĩ chipo ea fichixõ ea chanĩmara fakanax efe ipanakafo. Askatari, “Niosnoa noko tãpimafe,” ixõ ato yoyamafikatsaxakakĩ. Akka chipo ã ato tãpimaxii,

ixõ Niospa yoini keskara Isaías keneni.

²¹ Askafiaifono ãfe kaifoõnoa Niospa yoini iskafakĩ: “Nã pena tiixõ ãto shinã mëraxõ ã ato yoimis iskafakĩ: ‘Ekeki fekãfe,’ ixõ ã ato shinãmafiaino ekeki fepaikanima. Nikayospamisfo,” ixõ Niospa yoini keskara Isaías kirika keneni.

11

Niospa israelifo noikõi

¹ Mã iskafakĩ shinãiraka: “Epa Niospa afe yorafo israelifo mã pota,” ixõ mã shinãiraka. Mã askaito ã mato kematiro iskafakĩ: “Maa, ato keyokõi potama. Nãskaxõ eari potama ãri israeli. Akka Abraham fe Benjamín ãfe xini. Nãskax ã israelikẽ ea Niospa potama,” ixõ ã mato kematiro.

² Epa Niospa afe yora inõpokoaifo israelifo ato katoyonixakĩkai ato potamisma. Shinãkapo.

Nōko xini Elías israelifoōnoa yoikī kirika keneni iskafakī:

³ “Ēfe Ifāfe, a mī meka shara yoimisfo mā ato retemisfo. Askatari a mīsa kamakixō mia kīfimisfo mā potafo. Iskaratīa ē fistichi mia Ifofai. Anā ano tsoama. Eari retapaikani,” ixō Elías Nios yoini.

⁴ Nāskafaito nikakī Epa Niospa ʒafaa fanimē, Elías? Iskafakī kemani: “Maa. Meres fistikai mī ea chanīmara faima. Akka nāno mī kaifo siete mil yorafāfe ea chanīmara fakaxō afaa fetsakai ifoafaoma. Akka yorafāfe onifanifo āfe ane Baal, ‘Akai nōko niosra,’ famisfoma,” ixō Niospa Elías yoini.

⁵ Nāskarifiakī iskaratīari ēfe kaifo fisti rasichi mā Nios Ifoafafo, Niospamāi afetiama ato noikī ato katoyonino afe yora inōfo.

⁶ Niospa noko noikōisharakī noko ifi nō afe yora inō. Akka nō afara sharafaōxokai noko ifima. Niospa noko afaa kopi yōkaima noko ifixiki. Akka āakōi noko ifi noko noisharakī. Nāskakē nō afara sharafatiroma noko ifinō. Akka a nō kopifa keskara noko ōikī āakōi noko ifikeranama. Nāskakē noko afaa kopi yōkaima āakōimāi noko ifixō.

⁷ Akka ēfe kaifo israelifo fisti rasichi Nios fe-napaonifo afe rafexikakī, nāfomāi Niospa katoyonino afe yora inōfo. Akka israeli fetsafāfe Nios nikakaspapaonifo Nios fe rafekaspakakī. Akka a Nios nikakaspafāfe āto ōiti kerexkōifakaxō nikakaspakani.

⁸ Nānori Niospa meka kirika kenekakī iskafanifo: “Epa Nios nikakaspakani nā oxafō keskarafo afaa shinākanima. Askatari oa yora fēxo keskara ipaikani. Nāskaxō Nios nikakōipaikanima.

Askafaiŕafe Epa Niospa ăfe meka shara ato tăpimanima. Iskaratŕari năskakani,” ixŕ yŕra kirikaki keneneni.

⁹ Askatari David kirika keneneni iskafakă:

A Nios nikakaspaiŕafe shinăkani iskafakakă: “A nŕ piai ichapa ita nŕko afama mŕshtifori ichapa. Năskakă Niospa noko shara ŕi,” ixŕ shinăkani, Nios nikayamafikakă. Akka nŕko afama mŕshtiŕxŕ Niospa noko shara ŕima nŕ afe ĩpaxanŕ. A Nios nikakaspaiŕo ăto afama mŕshtiŕnoax fenoxikani afama mŕshtifo shinăifăfe. Niospa ato omiskŕimaxii.

¹⁰ Oa yora fĕxŕo keskara inŕfo. Askarafăfe Nios nikayamaifono oa yora afara efekŕi pefea keskara Niospa ato imanŕ, ixŕ David kirika keneneni a Nios nikakaspaiŕoŕnoa yoikă.

Judeofomafăferi Jesŕs chanĭmara fakanax afe ipanakafo

¹¹ Akka, ĩNiospa afe yorafo israelifo ato potapak-enakamĕ? Maa, ato keyokŕi potaima. Akka nă israelifăfe Cristo chanĭmara famisfomano a israelimafăferi mă Jesucristo chanĭmara fakani. Ifofai-fono Niospa ato ifi afe yora inŕfo. Akka nă israelifomafăfe mă Cristo chanĭmara faifono israelifăfe ato ŕikakă akairi Jesucristo chanĭmara fapaikani afe ipaxakakă.

¹² Ĕfe kaifăfe, afara chakafamisfo Jesucristo Ifo-fapaimisfoma. Akka Epa Niospa nă maitio anoafŕ Jesucristoŕnoa ato tăpimanano chanĭmara fakanax afe ipanakafo. Năskaxŕ Niospa ato shara faxŕi, inimakŕinŕfo. Askatari ĕfe kaifo judeofăferi chipo

Jesucristo chanĩmara fakanax inimai finakõixikani Niospa ato sharafaxõano.

¹³ Akka mã ãfe kaifoyamafiano Epa Niospa ea mato mẽra nĩchini Jesũsnoa ã mato yoinõ. ã inimakõi Epa Niospa ea katoni ã mato ano onõ.

¹⁴ ã mato yoiaino mã Cristo chanĩmara fayanaã mã inimakõiaito mato õikakĩ ãfe kaifãferi Jesucristo chanĩmara fapaikani, mato keskara ipaikakĩ. Nãskarakõi ipainõfora.

¹⁵ Shinãkapo. ãfe kaifo judeofãfe Jesucristo chanĩmara fayamaifono Niospa ato potani anã afe yorakõi inõfoma. Akka nã maifo tii anoafãfe Cristo chanĩmara fakanax Nios fe rafekani. Nãskakẽ ãfe kaifãferi Cristo chanĩmara faifono Niospa anã ato ifi afe yora inõfo. Nãskakanax sharakõi ixikani. Nã yora naax otoa keskara itirofo, inimakõikani.

¹⁶ Nãskaxõ ã anã mato yoinõ pãakiri keparanãkĩ iskafakĩ: Pãa kaxke pishta Niosnã ikano keyokõi ãfenã itiro. Nãskatari ifi ãfe tapo ãfenã ikano ãfe teshpafori keyokõi Niosnã itiro. Nãskarifiakĩ ãfe kaifãfe Jesucristo chanĩmara fakakĩ taefanifo fisti rasichi. Nãskakẽ ãto fenafãfe Nios Ifofakanax chipo afe yora ixikani chanĩmara fakanax.

¹⁷ ã mato afara fetsa anã yoinõ mã tãpinõ. ãfe kaifo judeofo ifi olivo ãfe põya keskarrafo. Nã ifi põya fimiona ifãfe mextexõ potatiro. Nãskaxõ ifi olivo fetsa nã nii mẽra nia ãfe põya fetsa fĩaxõ tichixotiro nã olivo kayakõiki. Nãskarifiakĩ judeofãfe Jesucristo chanĩmara fayamaito Niospa mã ato pota. Akka mã judeofoma. Mãfi nã ifi olivo nii mẽra nia keskarafokĩ. Nã ifi ifoyama keskarrafo, mã. Nãskax mã Epa Niospa yora ipaonima. Akka

Jesucristo mā Ifofaito Niospa mato ifi afe yora mā inō. Nāskata nā ifi olivo mā āfe pōya tichiax āfe tapo mēranoax yosiaino foaisharatiro. Nāskarifiakī nā judeofāfe āto xinifāfe mekaōxō mā Niosnoa tāpisharakōiafo nā ifi olivo yosiai keskaraxō.

¹⁸ Iskara shināyamakāfe: “Nō sharakē noko Niospa ifia. Akka judeofo chakafokē Niospa mā ato pota,” iyamakāfe. Shinākapo. Māfi ifi āfe pōya keskarafō. Ifi pōyakai āfe tapomais nitiroma, xanatiro. Ifi pōyafō aō tapoōnoax nia. Nāskarifiakī judeofo āto xinifāfe Nios tāpinifo taefakakī. Atoōxō māri Nios tāpitiro.

¹⁹ Mā shināiraka iskakī: “Ifi pōya chakakē, ifāfe mextexō pōtatiro. Nāskarifiakī judeofāfe Jesucristo chanīmara fayamaifono Niospa ato potani. Akka nō judeofo keskarama nō Jesucristo chanīmara faax nō afe ipanaka,” ixō mā shināiraka.

²⁰ Nā mā yoiai keskara chanīmakōikī kexemesharakāfe. Akka judeofāfe chanīmara fayamaifāfe Epa Niospa ato potani. Nā judeofo potani keskafakī Epa Niospa matori potatiroki. Kexemesharakāfe, mā anā Jesús chanīmara fayamaito matori potatiroki. Nāskakē kakapaiyamakāfe. Mā Jesús chanīmara fayamax mā fenotiroki.

²¹ Judeofāfe Nios chanīmara fakī taefafianifono chipo āto fenafāfe chanīmara fayamaifāfe Niospa ato potani. Māri mā chanīmara fayamaito matori potatiroki.

²² Akka shinākapo. Niospa noko noifiaino nō nikayamaino noko tāpimatiro omiskōimakī. Nāskakē judeofāfe chanīmara fayamaifāfe ato omiskōimakī ato potai. Akka Niospa mato

noikĩ afe yora mato imai. Nãskakẽ mato noiai keskara shinãfafãikãfe. Chanĩmara fafafãikãfe. Mã askafayamaino matori potatiro.

²³ Ëfe kaifo judeofãfe anã chaka shinãkakima, Jesús chanĩmara faifono anã afe yora Epa Niospa ato imatiro. Ifi mextexõ anã ãfe põya tichixotiro anã foainõ. Nãskarifiakĩ Epa Niospa anã ato ifitiro afe yora inõfo.

²⁴ Mãkai judeofoma. Judeofo ifi olivokõi keskarafo. Akka mã judeoma. Mã nã olivo nii mẽra nia keskara. Olivokõi ãfe ifãfe nã nii mẽra olivo ãfe põya xatexõ olivokõiki tichitiro foaisharanõ. Nãskarifiã mã Niospa yora ipaonima. Akka iskaratĩa Epa Niospa mato ifia mã afe yorafo inõ. Nãskakẽri ãfe kaifo anã Niospa ato ifipaisharakĩ ifitiro afe yora inõfo. Jesús chanĩmara faifãfe afe yorafo ato imatiro.

Epa Niospa judeofo anã ato ifixii afe yora inõfo

²⁵ Efe yora mĩshtichi, mãfi israelifoma. Meka fet-saõnoa mã nikamisma ã mato tãpimanõ mãto shinã mẽraxõ mã shinãnõ, nã ã mato yoiai keskara mã tãpiãx kakapaimis mã inõma, mã iskanõma: “Nõ israelifo keskarama, nõ sharafinakõia,” mã inõma. Chanĩma, iskaratĩa ãfe kaifo israelifãfe ãto õiti kerexkõixõ Niospa meka shara Jesúsnoa nikakaspakani. Akka israelifãfema Jesús chanĩmara faafono Niospa ato ifini afe yora ato imaxii. Nãskatari ãfe kaifãferi anã Nios chanĩmara faifãfe Niospa anã ato ifixii afe yora inõfo.

²⁶ Akka keyokõichi israelifãfe Jesús chanĩmara faifãfe Epa Niospa ato ifixii afe yora inõfo. Nãnori Isaías kirika kene ni iskafakĩ:

Nõko Ifo Siõn anoax oxii nõko chaka noko soaxoxiki nõ afe ìpaxanõ. Nã nõko Ifo israeli yora ixii. Nãato israelifo ifiyoi anã afara chaka ãto ifo inõma,

ixõ Isaías kirika keneni.

²⁷ Askata Isaías Niospa meka anã yoini iskafakĩ:

Ë ato yoyoni keskara ãto chaka ato soaxoxii, ixõ Niospa yoini Isaías kirikaki keneni.

²⁸ Jesúsnoa meka shara judeofãfe nikakaspakani, noikaspakakĩ. Akka mã judeoma. Nãskakẽ Epa Niospa mato sharafaxõa ãfe meka shara Jesúsnoa mã chanĩmara fanõ. Akka judeofãfe ãto xinifo Niospa yoini iskafakĩ: “Ë mato ifi mã efe yora inõ,” ixõ ato yoini. Nãskakẽ ãto xinifoõxõ Niospa ato noi, ãfe fenafori noikõi.

²⁹ Epa Niospa ãfe kaifo ãfe afama mĩshti inãxixakĩ yoyoni keskara anã fetsafaima afetĩamamãi ato ifiyonixakĩ. Nãskakĩ ato potapakenakama.

³⁰ Akka mã judeoyamafixõ mã Epa Nios nikayopaonima. Akka iskaratĩa mã anã nikayospa ipaima. Nãskakẽ Niospa mato sharafaxopai mã chanĩmara faito. Akka ãfe kaifo judeofo ato sharafaxopafaito nikakaspapaonifo. Nãskakẽ mã chanĩmara faito Epa Niospa mato noikĩ mato sharafaxõi.

³¹ Nã mã Nios nikakaspayopaoni keskakani ãfe kaifofo. Nãskafiaifono nã mato noiai keskari fakĩ atori Niospa noikõi. Nãskakẽ chipo Epa Nios anã shinãxikani.

³² Epa Niospa yoini tãpixõ iskafakĩ: “Yora keyokõichi chakafamisfo, nikayospafo,” ixõ yoini. Askafiaifono ato noikĩ ato chaka soaxoxii afe ìpaxanõfo.

Nios sharafinakōia

³³ ¡Aicho! ¡Nōko Nios sharakōi! Afama mīshti tāpikōia. Shināsharakōia. Āfe shinā mēraxō yorafoōnoa shināi keskara tsōa tāpitiroma. Aato akai keskara tsōa tāpitiroma.

³⁴ Tsōa nōko Ifāfe shināi keskara tāpitiroma. Tsōarikai nōko Ifo tāpimatiroma.

³⁵ Tsōarikai nōko Ifo afaa ināma noko niminō.

³⁶ Ares āfe shināmā shināxō afama mīshti oni-fani. Keyokōi āfenā. Aōnoax nipanaka. Nāskakē, “Nios sharakōira,” fapanakafo. Askapainō.

12*Afeskax Niospa āfe yonomati nō itiromākī*

¹ Efe yora mīshtichi, ē mato yoisharapaiyai keskara akāfe. Epa Niospa mato noikī mato sharafamiski. Nāskakē māri ināmekāfe mato Ifo inō, āfe yonomati ipaxakakī. Mā askaino anā afara chaka mato ifo itiroma, Nios mato Ifo iki. Shinākapo. Mā mēste shināsharakōikī Nios noiyanā sharafakāfe. Mā askafaino Nios matoki inimakōitiro.

² Nios Ifofaafāfema shināi keskara shināyamakāfe. Mā shināpaoni keskara anā shināyamakāfe. Iskaratīa Niospa mato shinā mēra fetsafapaiyai keskara shinākāfe. Afaa fetsakai mā shinātiroma. Mā askakī mā tāpitiroma Niospa mato imapaiyai keskara sharafinakōi. Mato imapaiyai keskara mā ikaino matoki inimatiroma.

³ Epa Niospa ea noikī ea yoia ē mato tāpimanō. Nāskakē ē keyokōi mato yoisharapai. Kakapaimis iyamakāfe. Niospa mato imapaiyai keskara fisti shinākāfe. Afaa fetsa shināyamakāfe. Niospa

mato shināmana keskara fisti matoōnoa shinākāfe. Mēstekōi matoōnoa shinākāfe. Mā Nios chanīmara fakī shinākāfe iskakī: “Ea Niospa imapaiyai keskara ē ipai,” ixō shinākāfe.

⁴ Ē mato afara fetsa ēa yoipai. Nōko yora fisti-fiano nō pōyayai fetsea. Askata nō feroyata, pachoyata, nā nō fisti askai fetsea. Nāskaxō nāfāfe nō afara fetsafo atiro.

⁵ Nāskarifiāi nōko Ifo Cristo fistikōi. Akka nōfi āfe pōya keskarata, āfe fero keskarata, āfe tae keskarata nō iki fetsea yora fisti fiāx.

⁶ Epa Niospa noko amapaiyai keskara nō aōxō fetsafo axosharatiro. Mā nō Nios Ifofaano a noko imapaiyai keskara noko imaketsai fetsa āfe meka ato yoinōfo, fētsari ato tāpimanō, fētsari afaamaisfori ato inānō. Nāskarafo noko imaketsai. Mā nō Nios Ifofaano noko noikī noko katoa noko amai keskara nō anō. Noko fetsafo katoa āfe shināōxō fetsafori āfe meka nō ato yoinō. Nāskakē mā mato katoano mā chanīmara faxō mato yoiai keskara fetsafori ato yoisharakāfe.

⁷ Mā mato fetsafo katokē āfe shināōxō fetsafori axosharafafāikāfe. Mato fetsafo katokē āfe shināōxō āfe meka ato tāpimasharakāfe.

⁸ Mato fetsafo katokē aōxō fetsafo ōiti ato fepeaxōfafāikāfe. Mato fetsafo katokē afara yopaifo inimayanā ato ināsharakāfe. Mato fetsafo katokē āto xanīfo mā inō. Nāskakē Niospa shināmana keskara ato yonomasharakāfe. Xanīfo mēsteshara ikāfe. Nā mato katokē āfe shināōxō omiskōiaifo ato noikī inimayanā ato axosharakāfe.

Afeskax Nios Ifofafo itirofomē

9 “Ē mato noira,” ifiata ato pārayamakāfe. Yorafo noikōikāfe. Afara chakafo noikaspakāfe. Afara shara noisharakāfe. Afo potayamakāfe.

10 Nā mā Nios chanīmara faafo tii noinākāfe. Mato fe yorakōifo fe mā noināmis keskariai noinōnākāfe. A mā mā nōimeai keskariai fetsafori ato noisharakāfe. “Fetsafo finakōiaki, ē finakōiyamaki,” ixō ato sharafakāfe.

11 Nōko Ifo yonoxoni xaniyamakāfe. Niospa Yōshi Sharaōxō inimakāi yonosharaxokāfe.

12 Epa Niospa mato sharafaxoxiai keskara shinākāfe. Nāfo shināi inimakāfe. Akka omiskōifi fena fenayamakāfe. Epa Nios kīfikī xateyamakāfe.

13 Nios Ifofaafāfe afara yopaifono ato inākāfe. Fetsafo pimsharakāfe. Pexe yopaifāfe mātō pexe mēra ato ikimakāfe. Ato kexesharakāfe.

14 Mato omiskōimanaifāfe ato kopiyamakāfe. Nios kīfikāfe iskafakī: “Epa Niospa ato chakafayamafe ato sharafafe,” ixō Epa Nios kīfikāfe. Nāskaxori ato ĭchayamakāfe. Askatamaroko ato sharafaxokāfe.

15 Inimaifono māri inimakāfe. Ato sharafaifono aōnoax inimakāfe. Oiaifono māri shināmitsayanā ato shinākāfe. Omiskōiaifono māri atoōnoax omiskōikāfe.

16 Afe feratenākakīma Epa Niospa mato shināmapaiyai keskara fisti anori shinākāfe. “Ē ato keskarama,” iyamakāfe. Xanīfofo fisti fe rafepaimis iyamakāfe. Afaayamafo feri rafekāfe. “Ē tāpia keskarakai fetsafāfe tāpiafoma,” ixō anori shināyamakāfe. Kakapaiyamakāfe.

17 Mato chakafafiaifāfe ato kopiyamakāfe. Āto ferotaifi isharakāfe, “Nios chakara,” fayamanō.

¹⁸ Keyokōi yorafo fe rafepaisharakāfe. Mā aska sharafapaifiaino fetsafo mato fe rafesharapaikani-ima.

¹⁹ Efe yora mīshtichi, fētsa mato chakafafaiato ato kopiyamakāfe. Epa Niospa meka yoikakī kenenifo iskafakakī: “Mato chakafaifo ē ato omiskōimanikai,” ixō kirika kenenifo. Epa Niospa yora chakafo ato omiskōimaxii. Mākai ato omiskōimatiroma.

²⁰ Ato kopitamaroko nā mato noikaspaifo fonāikaifāfe ato pimakāfe. Nōamā ikaifāfe ato ayamakāfe. Ma askafaito ōikani, “Noko kopikanimara,” ikanax rāfipainōfo.

²¹ Askata fetsafāfe mato chakafapaifiaifāfe māri kopikiri ato chakafayamakāfe. Chaka ifofayamakāfe. Askatamaroko afara sharafatitaifakāfe. Askafakī mā chaka potatiro.

13

Nō xanīfofo nikakōitiro

¹ Epa Niospa yoini keskara nā maitio ikafāfe xanīfofo katotirofo. Akka xanīfo finakōia nikata afe rafeafori nikakōikāfe Niospa ato xanīfo imaino. Akka Niospa xanīfo ato imayamaino itirofoma.

² Niospa noko yoini iskafakī: “Māto xanīfofo nikakōikāfe.” Akka māto xanīfo mā nikakaspakī Niosri mā nikakaspai. Mā nikakaspaito mato omiskōimaxii.

³ Akka nō isharaxkai nō xanīfoki mesetiroma. Akka nō isharayamax nō xanīfoki mesetiro. Xanīfoki mesexikima isharakāfe. Mā askaito mato chakafatama matoōnoa yoisharanōfo.

⁴ Xanĩfofo Epa Nios yonoxomis keskarafato mato axosharakani. Akka mã afara chakafaax xanĩfoki mã mesetiro. A xanĩfoafato afokai kaxpa xanĩfoafoma, mato omiskõimatirofo. Nãfofi Niospa õimati keskarafokĩ afara chakafaifãfe ato omiskõimatirofo.

⁵ Akka mãto xanĩfofo nikakõikãfe mato omiskõimayamanõfo. Mãto shinã mẽraxõ shinãsharakakĩ. Ato nikayamakĩ mã shinãtiro iskafakĩ: “Ooa, ẽ nikayospakõi. Nãskax ẽ shinãmitsaito ẽ mei,” ixõ mã shinãtiro xanĩfofo nikayamax.

⁶ Mãto xanĩfofo Nios yonoxomisfo keskarafato pena tii mato yonoxokani mã isharanõ. Nãskakẽ mato kori yõkaifãfe ato inãkãfe aõxõ mato axosharanõfo.

⁷ Mã ato nimixõ ato kori inãkãfe. Askatari ato noisharata ato noisharakãfe.

Nõ nõinõnãtiro

⁸ Tsoa nimiyamakãfe. Askatamaroko noinãkãfe. Noinã eneyamakãfe. Nã nõ yorafo noiaiõxõ Epa Niospa yoini keskarakõi nõ amis.

⁹ Noko yoikĩ iskafani: “Mãto ãfima fe iyamakãfe. Kẽrofori mãto fenema ferĩ iyamakãfe. Retemitsapaiyamakãfe. Yometsoyamakãfe. Fetsa pãrayamakãfe. Fetsa fĩapaiyamakãfe,” ixõ noko yoini. Afara fetsafori noko yoini. Nõ yorafo noikĩ na Epa Niospa yoini keskara nõ ato chakafaima. Nãskakẽ a mã mã noimei keskari akĩ fetsafo ato noife.

¹⁰ Nõ fetsafo noikõixõ nõ ato chakafatiroma. Akka nõ ato noikõikĩ Niospa yoini keskara nõ aki. Nõ ãto ãfi fe nõ ipaima. Askatari nõ ato noikõixõ nõ atoki yometsoima. Askatari nõ ato pãraima. Akka nõ ato noiaiõxõ Niospa noko yoia keskara nõ atiro.

¹¹ Nā Jesús fena oyoaima chāi ē taefakī Jesús Ifofani. Akka iskaratīa nōko Ifo Jesús mā chaima oi. Nāskakē ē mato yoiai keskara akāfe. Oxakatsa ikai keskara iyamakāfe. Oxakatsa ikīkai nō yonosharatiroma. Nāskakē xanikakīma Jesús yonosharaxokāfe itipinīsharaxikakī.

¹² Mā penaino samamakōi penatiro. Nāskarifiakakī mā nōko Ifo chaima oaino fakish mēra ika keskara iyamakāfe. Māto chaka xatekōikāfe. Jesús ika keskara māri xafakīa ikāfe afara chakafaxikakima.

¹³ Isharakōikāfe penano nō ōisharatiro pakexikima. Nāskarifiakī Jesús Ifofaax nō isharakōitiro afaa chakafatama. Akka fetsafāfe monokakī afara chakafaifo mēra foyamakāfe. Chaka fetsa fetsatapafo ayamakāfe. Pāeyamakāfe. Askatari māto āfima chotayamakāfe. Kēromāri māto fenema chotamayamakāfe. Afara chaka fetsafo shināyamakāfe. Feratenā faatanāyamakāfe. Fetsa xītipaimis iyamakāfe.

¹⁴ Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

14

Mato fe yorafo a Nios Ifofaafo mekafakī chakafayamakāfe

¹ Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nofe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekafakī chakafayamakāfe.

² Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiro: “Ēfi Jesús chanīmara fakī ēkai nami pitiro. Ē fanafo fisti pitiro,” ixō yoitiro Jesús meka tāpisharaxoma.

³ Fētsafāfe nami pikī a nami pimisfoma ato mekafakī chakafatiroma. Ato yoikī iskafatirofoma: “Mā afaa tāpiama. Nō nami pia shara, noko chakafatiroma. Nami shara,” ato fatirofoma. Nāskarifiakī nā nami pimismato a nami pimisfo ato mekafakī chakafatiroma. Ato yoikī iskafatiroma: “Nafāfe nami pikakī chakafakani,” ixokai atoōnoa yoitirofoma. Akka Epa Niospa keyokōi nāskarafo noko ifi nō āfe fakefo inō. Nāskakē fetsafo mekafakī chakafayamakāfe.

⁴ Jesús Ifofaafo kai māto inafoma. Akka afāfe Epa Nios yonoxomisfo. Nāskakē ato mekafakī chakafayamakāfe. Epa Niospa ato yoitiro. A chakafaifo ato iskafatiro: “Mā chakafai,” ixō ato yoitiro. Askatari a sharafaifo, “Mā sharafai,” ato fatiro. Akka a chaka shināifo Niospa ato tāpimatiro isharanōfo anā chaka shinānōfoma.

⁵ Akka a Nios Ifofaafo fetsafāfe shinākani iskafakakī: “A judeofāfe tenetitīa nō ichanātiro Jesús shināi,” ixō anori shinākani. Akka fetsafāferi shinākani iskakakī: “Nā pena keyokōi shara nō ichanātiro Jesús shināi,” ixō shinākani. Nāskaxō nā āto shināmā shināifo keskara shara. Nā shināifo penata ichanātirofo Jesús shinākani. Akka mā shināi keskara shināyamaifono ato mekafakī chakafayamakāfe.

⁶ “Na judeofāfe tenetitīa nō ichanātiro Jesús shināi,” ixō shināifāfe, nāfāfe nōko Ifo Jesús

Ifofasharapaikani. Akka a nã fatora penata nõ ichanãtiro Jesús shinãi ikaifãferi, nãfãfe nõko Ifo Jesús Ifofasharapaikani. Askatari fetsafãfe shinãkani: “Nõ nami pitiro. Aicho, Epa Niospa mĩ noko nami inã nõ pinõ,” ixõ shinãkani. Nãfãferi nõko Ifo Jesús Ifofasharapaikani. Akka fetsafãferi nã nami piyamaifãfe nãfãferi nõko Ifo Jesús, “Aicho,” fatirofo. Nãskaxõ nãfãfe Nios shinãsharapaikani.

⁷⁻⁸ Nõ niyoxõkai nõa nõ apaiyai keskara fisti nõ shinãtiro. Epa Niospa noko amapaiyai keskara nõ shinãtiro. Nõfi ãfenãfoki. Nãfi nõko Ifokĩ. A nõ naitĩari nõko Ifo Jesús niyoxõ nõ Ifofasharapai nokoki inimanõ. A nõ naitĩari nõko Ifo nõ shinãtiro nõmã ãfenãkõixõ.

⁹ Cristo noko nãxoni. Mã maifafono otokainixakĩ. Iskaratĩa mã nia. Nãskakẽ nõ nayoamax nõko Ifo iki. Mã nõ naaxri nõko Ifo ixii.

¹⁰ ¿Afeskafakĩ mato feta chanĩmara faafo mã mekafakĩ chakafaimẽ? ¿Afeskafakĩ mã fetsaõnoa mã shinãchakaimẽ? “Aakai afaamara,” ixõ mã shinãi. Shinãkapo, keyokõi nõ chipo Nios ikano nõ akiki nokoi kaikai. Askatari noko yoixii nõ afara sharafayamakẽ nõ chakafamiskẽ.

¹¹ Isaías Niospa meka yoikĩ kirika keneni.

Niospa yoini iskafakĩ: “Chanĩmakõi ã nia. Chanĩmakõiri keyokõi maifo tii anoafõ ekeki nokoxikani. Ekeki ratokonõ mai chachikaxõ yoixikani: ‘Epa Niospa, mĩ chanĩmakõi, mĩ Nioskõi,’ ixõ ea keyokõichi yoixikani.”

¹² Akka keyokõichi Epa Niospa ferotaifi nõ amis keskara nõ yoixii. Nõ shinãmis keskarari nõ yoixii.

Fetsafo afara chakafamayamakãfe

13 Nāskakē a mato feta Jesús chanīmara faafo mekafakī chakafayamakāfe. Iskafakī shinākāfe: “Nō afara chakafaito ōikaxō akairi chakafatirofo. Nāskakē nō afaa chakafapaima akairi afaa chakafayamanōfo.”

14 Jesús ēfe Ifokē ē mato yoisharapai. Keyokōi a nō piaifo shara nō pitiro. Nā ē chanīmara fakōini. Nāskafiano fetsafāfe shinākani iskafakakī: “Na pi-aifo nō pixō nō chaka shinātiro,” ixō shinākani. “Nō nami pitiroma,” ixō shināfikakī mā nami pikani. Nāskaxō chaka shinākani.

15 Mato feta fētsa Jesús chanīmara faito āfe ferotaifi a nami pitiroma piyamakāfe āfe shinā mēraxō shināchakanōma. A noikōixō mā āfe ferotaifi pitiroma. Nōko Ifo Cristo aōnoaxri nani. Nāskakē a pitiroma pikī mā fetsa shināchakamatiro. Nāskakē āfe ferotaifi piyamakāfe Jesús kachikiri faax fenoyamanō.

16 “A ē akai keskara chakama,” ixō mā shināfiaino fetsafāfe askara shinākanima. Iskafakī shinākani: “Na mā akai keskara chaka,” mato faifono mā xaterisafatiro matoxō shināchakayamanōfo.

17 A nō piaito Niospa yora noko imatiroma. Askatari a nō ayaito Niospa yora noko imatiroma. Akka Nios nōko xanīfokōino āfe Yōshi Sharaōnoax nō sharakōi. Nōko ōiti fekaxteima nō inimakōitiro.

18 Nōko Ifo Cristo nō nikasharaino Epa Nios nokoki inimasharatiro. Yorafāferi nokoōnoa shināsharatirofo.

19 Nāskakē Jesús chanīmara fai fetsafo fe isharakōikāfe. Jesúsnoa yoinōnākāfe a keskara shara ixikakī.

20 Niospa yoini keyokōi a nō piai shara.

Nāskafekē fetsafāfe, a Nios tāpisharafāfema shinākani iskafakakī: “Afara fetsa nō pixō nō chakafai,” ixō shināifono āto ferotaifi afara piyamakāfe. Akka mā āto ferotaifi piaino mato ōikakī āto shinā mēra shināchakatirofo. Nāskaxō anā Jesús Ifofasharatirofoma.

²¹ Mā nami piaito fetsafāfe mato ōikī shināchakatirofo. Nāskaxō anā Jesús Ifofatirofoma. Nāskakē āto ferotaifi afaa piyamakāfe. Askatari mā māmā ayaito ōikakī fetsafāfe shināchakatirofo. Nāskaxō anā Jesús Ifofatirofoma. Nāskakē anā ayayamakāfe. Afara fetsafori akī mā ato shināchakamatiro, nāskakē xatekāfe Jesús Ifofanōfo.

²² Nāskaxō mā shināi keskara mares shinākāfe. Epa Nios fisti mā yoitiro. Mā Nios chanīmara faxō mātō shinā mēra shināsharakī mā iskafatiro: “Chanīma, ē akai keskara chakama,” ixō shinākī mātō shinā mēra mā inimatiro.

²³ Nāskaxō fētsa Niospa meka tāpisharaxoma shinātiro iskafakī: “Nafō pikī ē chakafairakaiti,” ixō shināfikī akairi pikī chakafatiro. Afara fetsafori shinākī iskafakī: “Nafō akī ē chakafairakaiti,” ixō shinākī akairi akī chakafatiro.

15

Nā mā apaiyai keskara fatama fētsa apaia keskara axokāfe

¹⁻² Jesús chanīmara fakōixō a Niospa meka tāpisharafoma nō ato fenāmāshta yoitiro ato fe feratenātama. Nōa nō apaiyai keskara fisti nō atiroma. Nā Jesús chanīmara faa fetsafori noikī nō ato axotiro āto shinā mēra inimamakī shara inōfo Jesús Ifo sharafakōinōfo.

³ Shinãkapo. Nõko Ifo Cristo aafi apaiyai keskara fisti shinãpaonima. Aõnoa Nios yoimisto kirika keneni iskafakĩ: “Epa, ẽ mia nikakõia. Akka mia chakafakakĩ eari chakafakani,” ixõ kirika keneni Cristoõnoa yoikĩ.

⁴ Niospa meka kenepakenifo noko tãpimaxikakĩ. ãfe meka nõ çanĩmara faxõ afara chaka finõkõixõ nõ tenekõinõ. ãfe mekaõxõ nõko õiti nõ fepeaxõ nõ tãpitiro nõko Ifo fe nai mẽra chipo nõ afe ipanaka anã afara chakapa noko omiskõimanõma.

⁵ Noko afara chakapa afeskarafafiaito Epa Niospa noko mitsisfamatiro nõ tenenõ nõko õiti fepeaxokĩ. Nãskakẽ mã Jesús Ifofasharaino mato nãñori fisti shinãmati-ro.

⁶ Nãskakẽ nõko Ifo Jesucristo ãfe Apa nõ yoisharai. Nãskax nã meka fistipa nõ mekai keskarakõi Epa Nios yoisharakĩ nã yora fisti keskara.

Niospa meka shara judeofoma yoinifo

⁷ Cristo nokoki inimakĩ noko ifini afe yorafo nõ inõ. Nãskakẽ mãri fetsafo fe yõra faatanãkãfe. Mã askaino Niosnoa shinãsharati-rofo.

⁸ Ẽ mato yoinõ Jesucristo mai ano oni judeofo ato yonoxomis keskara ikiyoi. Niospa nõko xinifo yoiyoni keskara Cristo oni. Nãskakẽ Niospa nõko xinifo yoini keskara chanĩmakõikẽ nõ tãpitiro.

⁹ Akka judeofomaõnoaxri Jesús oni. Nãfãferi chanĩmara faxõ yoixikani iskafakakĩ: “Aicho, Epa Niospa noko noikĩ ãfe Fake nokoki nĩchini. Epa Nios shara,” ixõ yoixikani. Nãñori David kirika keneni iskafakĩ:

Epa Niosi, ẽ mĩõnoa ato yoisharaxii, a judeofoma. Ẽ mia fanãki, “Aicho, Nios shara,” ẽ mia faxii,

ixõ kirika keneni.

¹⁰ Anã Niospa meka yoikĩ kirika keneni iskafakĩ:

Judeofoma nã judeofo fe inima faatanãkãfe.

Mãri ato fe Niospa yora ixii,

ixõ kirika keneni.

¹¹ Anã kirika keneni iskafakĩ:

Maitio anoafãfe, nõko Ifoõnoa yoisharakãfe.

Keyokõi nã maifo tii ikafãfe nõko Ifo fanãkãfe,

ixõ kirika keneni.

¹² Isaías aatori iskafakĩ kirika keneni:

Nõko xini Isaí ãfe fena na maitio ikafãfe ãto xanĩfo ixii. Shinãxikani iskafakakĩ: “Nã fistichi Nios ika ano noko ifitiro nõ afe ipaxanõ, nõ anã nanakama,” ixõ shinãxikani,

ixõ Isaías kirika keneni Cristoõnoa yoikĩ.

¹³ Epa Nios chanĩmara faxõ nõko Ifo oxiiaino nõ manai. Epa Niospa noko shinãmani iskafakĩ:

“Chanĩma, nõko Ifo oxii noko ifixiki nõ afe ipaxanõ,”

ixõ noko shinãmani. Nãskakẽ ẽ mato kĩfixomis Niospa mato inimamanõ. Askatari mato shinã

mẽra mato shinãmasharai mã afeskatama mã isharanõ mato axosharai. Mã Nios chanĩmara faano ãfe Yõshi Sharapa mato axosharai mã isharanõ.

Pablo Jesucristoõnoa judeofoma ato yoini

¹⁴ Efe yora mĩshtichi, mẽ tãpia mã noinã faatanãito Jesúsnoa mã tãpisharai mã yoinõnãsharatiro.

¹⁵⁻¹⁶ Niospa ea noikĩ ea katonni Jesucristo ãfe yonomati ẽ inõ, ãfe meka shara ẽ mato tãpimanõ. Nãskakẽ ẽ ranotama anã aõnoa ẽ mato shinãmasharai kirika kenekĩ. Akka Niospa ea

nĩchini judeofoma ẽ ato Jesú s Ifofamanõ. Mã Jesú s Ifo sharafaxõ, mãto chaka mã soax a keskara shara mã inõ. Nãskax Epa Nios matoki inimakõ i.

17 Nãskakẽ ẽ inimakõ i nõko Ifo Jesucristomã i ea katonikẽ Epa Nios ẽ yonoxonõ judeofoma Niospa meka ẽ ato yoinõ.

18 Ɛa ẽ ato yoima. Cristo ea shinãmanaino ẽ ato yoimis. Nãskakẽ a ẽ ato yoimis keskara Epa Niosnoa nikakõ imisfo.

19 Ɔfe Yõshi Sharapa ea shinãmanaino a tsõa atiroma keskara ẽ ato õimana. Nã maitio Jerusalén anoafõ yoita Ilírico anoafõ i ẽ ato yoini. Keyokõ i nã meka shara Cristoõnoa ẽ ato yoifofãsafamis.

20 Ɛkai a yora fetsafãfe Cristoõnoa yoimisfo ari ẽ kapaimisma. A Cristoõnoa nikamifõ ma ano ẽ kapaimis ato tãpimaxiki.

21 Nãnõri Isaías Niospa meka keneni iskafakĩ:
Tsõa aõnoa nikayõmisma chipo nikakaxõ tãpinõfo,
ixõ keneni.

Pablo Roma ano kapaikĩ shinãni

22 Akka ẽ mato ari kapaimis. Ɛ mato õikapafi ẽ kamisma. Afara fẽtsa ea katimafamis.

23 Nãskafixõ iskaratĩa Jesú snoa mẽ ato yoikĩ mẽ mitõa. Nãskax mẽ itipinĩa mato ari kaxiki. Mẽ xini ichapa amis mato õikapaikĩ. Mẽxõtõima ẽ mato ari kapaimis.

24 Ɛ España ari kai ẽ mato ano nẽteyõxii mato fe mekaxiki nõ yoinõnãsharaxiki. Mato anoax ẽ kaitõ a ẽ yõpai ea inãxikãfe ẽ España ari nokosharanõ.

²⁵ Akka iskaratīa ē Jerusalén ano kayoikai. Jesús chanīmara faafāfe ea nīchikani a Jerusalén anoxō Jesús chanīmara faafo ē ato kori inānō.

²⁶ Macedonia anoxō a Jesús chanīmara faafāfe Jerusalén anoafo a Jesús chanīmara faafo ato kori ināpainifo. Acaya anoxori Jesús chanīmara fakaxō ato kori ināpainifo a afaamaisfo. Nāskakē ea kori inānifo ē ato inātanō.

²⁷ Inimayanā ato ināpaikakī ato yoinifo iskafakakī: “Jerusalén anoax Jesúsnoa yoimisfo nokoki fenifo Jesúsnoa meka shara noko yoi fekani. Akka nokoki feyamanifono na meka shara nō nikakeranama. Nāskaxō nō afarayaxō nō ato ināpai ato sharafakī,” ixō yoinifo.

²⁸ Nāskata ē ato kori ināfainikai Jerusalén anoax España ari kakī. Nāskaxori ē Roma anoa ē mato ōifainikai.

²⁹ Mē tāpia ē mato ano nokoxō nōko Ifoxō ē mato yoisharaxii mato shinā mēra mā inimanō.

³⁰ Efe yora mīstichi, meka fetsari ē mato yoipai. Mā nōko Ifo Jesucristo noixō āfe Yōshi Sharaōxō ea noikāfe. Ea Nios kīfixokāfe ē yonosharaxonō afanā ea afeska fanōma.

³¹ Ea kīfixokāfe Epa Niospa ea kexenō Judea anoafāfe a Jesús chanīmara faafāfema ea afeska fanōfoma. Ea kīfixokāfe a Jesús chanīmara faifo Jerusalén anoafo ē ato kori ināino inimakōikai finōfo.

³² Mē ato inākī mitoano Epa Niospa ea nīchiano ē inimayanā matoki nokoxinō. Nāskata nō yoinōnāsharaxinō nōko ōiti mēra inimayanā.

³³ Epa Nios mato fe inō. Akka Niospa noko imasharatiro nō isharanō.

16

Pablo ato meka fomani

¹⁻² Nofe yora Febe, Cencrea anoax matoki nokokē sharafakāfe. Nā kēromā nōko Ifo Ifofasharakōimis. Cencrea anoxō a Nios Ifofaafo ato sharafaxomis. Yora fetsafori ato afara yopaito axokāfe.

³ Aquila āfe āfi Prisca nā rafe efeta Jesucristo yonosharaxomisfo. Ea ato yoisharaxokāfe.

⁴ Yorafāfe ea retepaiyaiifāfe nā rafeta ea kexesharamisfo ea reteyamanōfo. Ēfe kaifomari nā Jesús chanīmara faafāfe ichanākaxō yoimisfo iskafakī: “Aquila yafi Prisca nō atoki inimsharakōi,” ixō yoimisfo.

⁵ Āto pexe anoaxri ichanākaxō ea ato yoisharaxokāfe. Efe yorakōiri Epeneto ea yoisharaxokāfe. Nāatofi Ašia anoxō Cristo chanīmara fakī taefaniki.

⁶ Marīari mato yonosharaxomiski aari ea yoisharaxokāfe.

⁷ Efe yora raferi Andrónico yafi Junias ea ato yoisharaxokāfe. Nā rafe efe karaxa mēra ikinifo. A Jesúsnoa yoimisfāfe a rafeōnoa yoisharamisfo. Ē Jesucristo chanīmara famatai nā rafeta chanīmara fakī taefanifo.

⁸ Ampliatori ē noishara nāatomāi nōko Ifo Ifofasharakōiaito. Aari ea yoisharaxokāfe.

⁹ Urbano efeta Jesucristo yonoxomis. Nārifi ea yoisharaxokāfe. Efe yorashtari Estaquis nāri ea yoisharaxokāfe.

¹⁰ Apeles feronāfake sharakōi. Epa Nios akiki inimamis. Nāatori Jesucristo yonosharaxomis. Nāri ea yoisharaxokāfe. Aristóbulo yafi afe yorafori ea ato yoisharaxokāfe.

11 Efe yorashtari Herodión ea yoisharaxokãfe. Narciso yafi afe yorafãferi nõko Ifo chanĩmara faafo, afori ea ato yoisharaxokãfe.

12 Trifena yafi Trifosari ea ato yoisharaxokãfe. Nã kêro rafeta nõko Ifo yonosharaxomisfo. Nofe yora Pérsidari ea yoisharaxokãfe. Nã kêromãri nõko Ifo yonosharaxomiski.

13 Nõko Ifãfe Rufori katonni afe yora inõ. Nã Rufo ãfe afa ãfe efakõi keskara. Ea kexesharamis. Nã raferi ea ato yoisharaxokãfe.

14 Asíncrito ikaino Flegonte ikaino Hermas ikaino Patrobas ikaino Hermes ikaino nãfãfe nõko Ifo chanĩmara faafo. A fetsafãferi nõko Ifo chanĩmara fakanax ato fe ikafori ea ato yoisharaxokãfe.

15 Filólogo ikaino Julia ikaino Nereo ikaino ãfe poi Olimpasi ikaino keyokõi a nõko Ifo chanĩmara fakanax ato fe ikafori ea ato yoisharaxokãfe.

16 Keyokõi ichanãkanax yoinõnã faatanãsharakãfe noinõnãsharaxikakĩ. Nã maitio ikafãfe a Cristo Ifofaafãfe mato yoisharapaikani.

17 Efe yora mĩshtichi, ã mato yoinõ nikakapo. Mato fe ichanãmis fetsafãfe mato afara chakafamapaikani anã mã Jesúsnoa shinãnõma. Akka nõ mato mēstekõi tãpimanai keskara nãfãfe mato anori yoikanima. Akka fakirira mato yoipaikani anã mã Jesús shinãnõma. Nãskax ato fe rafeyamakãfe, mato pãratirofokĩ.

18 Afãfekai nõko Ifo Cristoõxõ yoimisfoma. Nãfãfe afara fipaiyaifo fistis shinãmisfo. Niospa meka tãpisharafoma ãto meka fistiõxõ ato pãrapaikani ato anorima shinãmaxikakĩ.

19 Keyokõichi mã nikafo nõko Ifo mã

Ifofasharakōikē. Nāskakē ē matoki inimakōini. Afara sharafoōnoa tāpikōikāfe. Mā afara chakaōnoa tāpiyamakāfe. Afoōnoa shināyamakāfe.

²⁰ Epa Niospa mato imasharatiro mā ishara-nō. Nāato Satanás mato nāmā potai anā mato afeskafanōma. Nōko Ifo Jesucristo mato sharafax-opainō.

²¹ Nā Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nāfāferi mato mekashara fomakani. Nāfo efe yorakōifo.

²² Nā Terciori mato mekashara fomai. Nāato ea kirika kenexona.

²³ Gayopa pexe mēra ē ikē ea kexemis. Jesús chanīmara faa fetsafori Gayopa pexe mēranoax ichanāmisfo. Nāfāferi mato mekashara fomakani. Na Erasto pexe rasi anoa ato kori kexexomisto mato mekashara fomai. Askatari nofe yora fetsari Cuarto nāatori mato mekashara fomai.

²⁴ Nōko Ifo Jesucristo mato noikī mato sharafanō. Askapainō.

Mā ato yoikī enekī Niosnoa ato yoisharani

²⁵⁻²⁶ Epa Niospa mato kexesharanō. Ē Jesucristoōnoa mato yoimis keskara āfe shināmā mato shināmatiro mā Ifofasharanō. A iyopaonifāfekai tsōa Jesucristoōnoa tāpiyopaonifoma. Akka iskaratīa keyokōichi mā tāpiafo. Epa Niospa nā nipanakato noko nīchini Jesucristoōnoa nō ato yoinō. A ix-iainoa Epa Niospa ato yoini nānorikōi kirika ken-nifo. Nā maitio ikafāfe Jesús chanīmara fayana nīkasharatirofo.

27 Nõko Ifo Jesucristoxõ keyokõichi Niosnoa
yoisharapakenakafo. Nõko Nios fistichi keyokõi
tãpikõia. Askapainõ.
Nã tii ã mato yoi.

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

6c7b7ce2-9d87-5405-91e6-71ce1387adcc